

Mekbê idjaer kute amikajmã'ã Jeju mar nhõ pi'ôk no'ôk ne ja.

Me'ô ne Jeju'ã pi'ôk no'ôk ne kam mekbê idjaer kute amikajmã'ã Jeju markumrêx jamã ano, ar kute mrãmri Jeju'ã ngràkumrêxmã. Mekbê idjaer kwỳ ne ar amikajmã'ã Jeju man kam arỳm kute ari mỳjjakôt akêxmã. Nãm ar abenmã,

—Gwaj akubyn Môjdjê kukràdjà tùmjakôt amijo baba.

Ne ajte,

—Gwaj akubyn Metĩndjwỳnhmã mry bôn kamrô kapĩ. Birãm Jeju kamrô me bajaxweo bingràn nhãm kutã kêt, gwaj akubyn mry kamrôdjwỳ me bajaxwe pãnh ajte Metĩndjwỳnhmã kungã ane. Kam ne me'ô arkum pi'ôk no'ôk ne arkum,

—Kati, Jeju pydji kute me bajaxweo bingràn djwỳnh. Kwãrik wãnh atemã ibej mỳjja 'ô jabej kêt. Jeju kamrô pydji ne me bajaxwe mãmnhkutã. Kwãrik wãnh Jeju kamrô nhibej mry kamrô nhôr kêt, ane. Nãm ã anen kam arkum Jeju mex jarẽ. Jejubê ne Metĩndjwỳnh kra. Jeju ne mỳjja kunĩ kurãm mexkumrêx. Ne kadjy mrãnh djwỳnh kurãm raxi. Ne Môjdjê kurãm raxi. Ne me kute me kadjy Metĩndjwỳnh mar djwỳnhja kurãm raxi. Jeju kamrô ne mry kamrô kurãm mexkumrêx ne kam kute o me axweo bingràn kadjy mexkumrêx. Nhym Jeju kukràdjà nyja ne Môjdjê kukràdjà tùm jakàjbê bôx ne kurãm mexkumrêx. Kam gêdjã me mrãmri Jeju'ã ngràkumrêx ne mã 'amỳn kanga kêtumrêx ne mã kôt ajkamên ô pykakam bôx, kàjkwakam ô pykakam bôx.

Metĩndjwỳnh kra kute raxo kadjy mrãnh djwỳnh jakrenh.

Kor 1.15

1 ¹Amrêbê ne Metĩndjwỳnh me bakukãmãremã kabên. Me kute kabên jarênh djwỳnhkôt ne memã kabên, ne apỳnh mỳjja djàri kôt memã amijo amirĩto tẽ. Nãm memã kabên tẽm tãmtã ĩ amũ kamingrãnymã kabên ba. ²Nhym bep ajbir ne Krakôtbit me bamã kabên ne. Ajbir ne akati kute o ino rerkambit Krakôt me bamã kabên ne me bamã amijo amirĩt ne.

Bir be, arỳm kute Kramã mỳjja kunĩ kangaja pumũ. Nhym kam Kra arỳm pykamẽ kàjkwamẽ mỳjja kunĩ 'y. Metĩndjwỳnh djô'ã ne mỳjja kunĩ

'y. ³Nām Metĩndjwỳnh jadjēho adjēnh ne. Kubê Metĩndjwỳnh tām. Ar kute aben pyrāk. Nām 'itỳxkumrēx ne kam ta amikabēnkôt mỳjja pumũnh 'āno dja. Kute mỳjja kunĩ nhipēxja pumũnh 'āno dja. Djām kabēn ngri got. Nām ta amikabēn pymao mỳjja kunĩ pytàn 'āno djan ar o ba.

Bir be, tǎwǎ ne me babê me bajaxweo pōx ne me bajo mex ne kam arỳm mǎ tē, mǎ kǎjkwamǎ tēn kam nhỹ, Metĩndjwỳnh djubōk'ānh nhỹ. Metĩndjwỳnh kubê kumkati djubōk'ānh nhỹ. Djām me kātām ne me me bēnjadjwỳr rũnh djubōk'ānh krĩ? Kati, ām me bēnjadjwỳr rũnhbit. Me bēnjadjwỳr rũnh ne me me ubōk'ānh krĩ.

⁴Nǎ, kra ne ra:xi. Raxo kute kadjy mrǎnh djwỳnh jakrenh mexi. Ne umaodjwỳ kute kadjy mrǎnh djwỳnh jakrenh. Bām ne 'ǎ bēnjadjwỳr mē nhym uma: ne. ⁵Nhỹnh ne Metĩndjwỳnh kadjy mrǎnh djwỳnh 'ōmǎ kum,

“Mrāmri abê ikrakumrēx. Jakam ne ba arỳm ajo ikrakumrēx ga amipǎnh ijo Abām kumrēx”, ane got.

Kati, kramābit ne ǎ kabēn ane. Nār kon, nhỹnh ne Metĩndjwỳnh kadjy mrǎnh djwỳnh 'ō'ǎ memǎ kum,

“Dja ba o ikra nhym ijo Bām”, ane got.

Kati, Kra'ābit ne ǎ kabēn ane. ⁶Ne kam ajte, kute pykamǎ kra janorkam memǎ kum,

“Gora gē ikadjy mrǎnh djwỳnh kunĩ ikramǎ rax jarē”, ane.

Be, kubê Metĩndjwỳnh krakam arỳm kum mỳjja kunĩ re nhym rax ne.

⁷Nhym bep kadjy mrǎnh djwỳnh'ābit ne,

“Nǎ bām amikadjy mrǎnh djwỳnh nhipēx nhym kute kōkmē kuwy pyrāk. Akrānmǎ imǎ mrǎnh ne ikadjy àpēnhmǎ”, ane.

⁸⁻⁹Nhym bep Kramābit ne kum,

“Be, Metĩndjwỳnh, mrāmri dja ga meo aba rǎ'ǎ rǎ'ǎ ne.

Nǎ gām katāt meo aban amǎ mỳjja mexbit kĩnh ne katāt amijo aba ne amǎ mỳjja punu kurê.

Kam ne ba ibê anhō Metĩndjwỳnh ne amijo apytàn arax kadjy adja.

Ga kam akĩnhkumrēx ne. Nǎ gām araxmē akĩnh anhōbikwa kunĩ jakrenh mex ne”, ane.

Nām ǎ Kramǎ ane ne kam ajte kum,

¹⁰“Ga, Bēnjadjwỳr, ga ne ga krax kurũm pyka nhipēx ne anhikrao kǎjkwa nhipēx.

¹¹⁻¹²Dja ĩ apēx. Nhym bep kati, gajbit dja ga arǎ'ǎ: rǎ'ǎ rǎ'ǎ.

Nhym bep kati, dja ĩ kute kubēkǎ pyrāk ne tũm ne.

Mrāmri ne me kute kubēkǎ, mỳjja tũm, inōkǎ tũm nhym me kute krǎn o mrǎnh ne 'ê'ǎ rēnhja pyrāk. Dja ga ĩ ǎ kǎjkwamē pyka tũm krǎn o atēm ne mēnhō ane. Ne kam arỳm pǎnh ny nhō.

Nhym bep ga dja ga tũmrām arǎ'ǎ rǎ'ǎ ne. Ga adjwỳnh tāmō dja ga amũ arǎ'ǎ: rǎ'ǎ ne. Dja ga atemǎ kêt kumrēx”, ane.

Bir be, nām ǎ Kramǎ ane.

¹³Nhỹnh got kadjy mrǎnh djwỳnh 'ōmǎ kum,

“Amrê idjubôk'ãnh nhỹ, abênjadjwỳr raxkam idjubôk'ãnh nhỹ.
Ikutêp nhỹ ba 'ỳr amrê awỳr akurê djwỳnho mỗ ga kwỳ o apardjan
kwỳ nhimex”, ane.

Djãm kute kadjy mrãnh djwỳnhmã ã anhỹr got? Arkati, Kramăbit ne ã kabên ane. ¹⁴Nhym bep kadjy mrãnh djwỳnh ne Metĩndjwỳnh nhỗ ãpênh kajgo. Djãm mebêngôkre got^a amirĩt ne? Kati, me kute noo omũnh kêt nhym Metĩndjwỳnh me bakadjy ano. Me ba ba, Metĩndjwỳnh kute me bapytâr ne kute ar me bajo bamă, me bawỳr ne anoro dja, kute me bapumũnh ne kute me bajăno ămmă ne me bawỳr ano.

Me kute Metĩndjwỳnh kabên mar 'ăno ămmă.

2 ¹Bir be, kam, Metĩndjwỳnh kute me bamă krabê kumkati janorkam dja gwaj tu amijamakkrekam nhôrkumrêx. Me kute gwaj bamă katât arênh gwaj baje marja tăm dja gwaj tu amijamakkrekam nhôrkumrêx ne 'amỹnh tỹx, gwaj baje o babiknor karô. Dja gwaj ate ar bakrăn baban kam ĩ o babiknor mex ne, o babiknor mexo tễ.

²Amrêbê ne kadjy mrãnh djwỳnh memă Môjdjê kukrădjă jarê, me kute kôt amijo bamă. Nhym me'ô kôt kute amijo ba kêt năr kon kubê binhirênh kată nhym kam arỹm kum o păn̄h ne. Katât kum o păn̄h ne. ³Bir be, dja gwaj badjwỳ ate bakrăn ar baba djãm kute gwaj bamă o păn̄h kêt mă? E kum kati, gêdja gwaj bamădjwỳ o păn̄h ne. Amrêbê ne Metĩndjwỳnh memă kukrădjăbit jarê. Nhym me ate krăn ar ba nhym arỹm memă o păn̄h ne. Nhym bep ajbir, ajbir ne me bamă kra ngă, krabê me bapytâr djwỳnh me bamă kungă. Djãm ate gwaj bakrăjamă kute o păn̄h kêt mă? E kum kati ne. Dja gwaj bamădjwỳ o păn̄h ne. Bênjadjwỳr ta ne kumrêx memă amijarê, kute me utărmă amijarê. Nhym kam kute ar meo baja, me kôt baja ne me kuman kam ô'ă gwaj bamă kôt arê, kabêno kabên ne gwaj bamă arê.

⁴Nhym Metĩndjwỳnhdjwỳ kôt mỳjja kwỳo amirĩt, me kute kôt kum kator kadjy ne umao apôx ne o mỳjja 'yro ba, apỹnh mỳjja pumũnh kêt 'yro ba, me kôt baja ne me uma proo mỳjja 'yro ba. Năm me me akrymê me kanêo mex, me tyk kwỳo tũn, bôm me nêje me karô rê, ă ar meo anhỹro ba. Nhym kam Metĩndjwỳnh ajte kôt memă ta Karô jano, apỹnh ãpênh djări ne kadjy tu ukabikôt memă kungră. Năm ă Metĩndjwỳnh kute meo bao ane, me kute Jejumă kator kadjy.

Jeju amijo kubêngôkren kute me bapyrăk.

⁵Djãm kadjy mrãnh djwỳnh Metĩndjwỳnh kute amim umjỳr got? Kute ar pykao ba kadjy, kute amim umjỳr got? Ije ar amă pyka ny jarênhja tăm, djãm kute ar o bamă? Kati, Jejubit ne kute ar pykao ba kadjy Metĩndjwỳnh amim kudja. Kute mỳjja kunĩo ba kadjy ne amim kudja. ⁶Ă ne me'ô Metĩndjwỳnh kabênkam,

^a 1.14 Apỹnh me ô pyka djări kunĩkôt ne me kunĩ bêngôkre. Kubêkă jakamê me kakrătykmê me babêngôkremê ne me kunĩ: bêngôkre.

“Ē, Metĩndjwỳnh, djãm me ibêngôkre imex got ga aje me imar rã'ãmã? Mỳkam ne ga me ikakritjao djuw mex ne?

7 Nã gãm o kàtàm, akadjy mrãnh djwỳnh kôpdj'ã o kàtàm. O kàtàm 'iry kêt ga ajte umamẽ raxo utà 8 nhym ajte mrãmri bẽnjadjwỳr rax ne mỳjja kunĩ ba”, ane.

Nãm ã Metĩndjwỳnh kabẽnkam ane. Ga kute mỳjja kunĩ baja pumũ. Nhỹnh ne mỳjja'õ kubẽ 'ã kàtàm ne? Kati. Djãm me babêngôkre'ã ne kabẽnja? E kum kati, Jeju'ã ne ã ane. Mebêngôkre kute mỳjja kunĩ ba kêtja pumũ.

9 Nhym bep Jeju'ã ne ã ane. Mrãmri ne kadjy mrãnh djwỳnh kurãm kàtàm 'ikrãn mex ne, nhym Metĩndjwỳnh ajte 'ã raxmẽ umamẽ kumẽ. Nãm me bapãnh ty nhym kam pãnh Metĩndjwỳnh 'ã kute raxmẽ umamẽ mẽnho ane. Metĩndjwỳnh me bakam ukaprĩ kôt ne amim kra'ã karõ nhym kam me bapãnh ty, me bakunĩ pãnh ty. Djã nãm tyk kadjy tokry kêt ne ty? Kati, nãm tyk kadjy tokry: ne. Nhym kam pãnh Bãmja 'ã umamẽ ra:xmẽ kumẽ.

10 Djãm Metĩndjwỳnh kute kra tokry'ã amim karõja punu got? Kati, mrãmri katát. Metĩndjwỳnh kute mỳjja kunĩ 'yr ne kute ar o baja tãm ne krabẽ Jeju'ã amim karõ, kute tokry maro tẽm ne inomã mẽn ne kam mrãmri kubẽ me bapytãr djwỳnhkumrẽxmã. Tokrykôtbit ne me bapytã. O ne Metĩndjwỳnh me bakrãptĩ pytàn me bajo kra, kute õ kàjkwa mextiremã me bajo tẽm gu me kramẽ baro'ã arkam babamã. Jeju ne me bamã wan me bamã pryõ mõn kàjkwamã wadjã. Dja gu me ĩ kôt pry'ã mõn wadjã.

11 Bir be, ta Bãm ne kubẽ me Babãm pydji. Ta, kute me bajo mex ar o bajamẽ gu me bamẽ ne gu meo Babãm pydji. Kam ne me bajo kamy. Me bakam pijãm kêt ne tu me bajo kamy. 12 Nãm Bãmã kum,

“Dja ba ikamyremẽ ikanikwỳnhremã ajo amirĩt.

Me kute aben pydji nhipôkri dja ba memã amex jarẽ”, ane.

13 Ne kam ajte,

“Metĩndjwỳnh kanàrrãm dja ba ar amijo iba”, ane.

Ne kam ajte,

“Ota ba dja. Metĩndjwỳnh kute imã ikra nhõrjamẽ ro'ã ne bar dja”, ane.

Nãm ã Jeju gwaj bajo õbikwao ane. 14 Bir be, Metĩndjwỳnh krabẽ ne gu me babaja. Ga me banhĩja pumũ. Me barerek, me bakatyk, me bakanẽ, me batokryja pumũ. Kam ne Jeju amijo kubêngôkren^b kute me bapyràkã. Ne kam amitykkôt Xatanajo ajkẽ. Xatanaj kute memã tyk jarẽn nhym me kabẽnkôt tykja tãm ne prĩne o ajkẽ. Kadjy ne amijo kubêngôkren ty.

^b 2.14 Kritu ne amijo kubêngôkre kute mrãmri ne apỹnh me õ pyka djãr kunĩkôt me kunĩ: bêngôkreja pyràk. Kubẽ kã jakamẽ me kakrãtykmẽ me babêngôkremẽ ne me kunĩ: bêngôkre. Me kamrômẽ me kukràdjã kunĩ kubêngôkreo aben pyràk. Jakam dja ga Karõ 17.26 jarẽn ama.

¹⁵Ta amitykkôt Xatanajo ajkên kubê me bakaba. Nã gu me bamã batyk puma: ne. Me batĩnri bamã batyk puma: ne. Nhym kam Jeju ne me bakadjy tyn kam o me bamã me batyk pymajao ajngrã, gu me arým bamã uma kêt ne.

¹⁶Djã nãm amijo kadjy mrãnh djwýnh ne ruw ne me uta? Kati, nãm amijo kubêngôkren ruw. Nãm amijo Abraão tãmdjwý 'õn ruwn me uta.

¹⁷Kam ne me bajo kamykumrêx ne kam kamymê kute aben pyrãk. Nãm me banhõ ã, ne kam me bakôt tokry, me bakôt mýjja maro ba, me bakôt muw, me bakôt kĩnh. Bir be, nãm prĩne kute kamy bêngôkre pyrãk, kute me bapyrãk ne kam arým kubê Metĩndjwýnh mar djwýnh nhõ bẽnjadjwýr rax djukaprĩkumrêx ne Metĩndjwýnhmã àpênhkumrêx ar ban kute kanga kêt. Nãm me bakadjy Metĩndjwýnhmã amijarê, me bajaxwe pãnh tyk jarê, nhym arým me bajaxweo ajngràn me bajaxweo akno.

¹⁸Djãm me banhõ Metĩndjwýnh mar djwýnh nhõ bẽnjadjwýr kute gwaj bamar kêt, kute gwaj batokry mar kêt? Kati, kute gwaj bamar. Xatanaj kute gwaj bajo baja mar. Djãm kute adjwýnhdjwýmã mýjja jarênh kêt, axwe'ã àpnênh kêt. Pykabê ar baridjwý ne kum axwe'ã apnê nhym adjwýnhdjwý tokry: ne. Kute tokrydjwý mar. Kute mýjja kunĩ mar. Kam dja gwaj bakam ukaprĩ: ne gwaj bawýr prôt ne kubê gwaj bapytã. Xatanaj kute gwaj bamã axwe'ã àpnênhkam dja gwaj bawýr prôt ne kubê gwaj bapytã.

Jeju kute raxo Môjdjê jakrenh.

3 ¹Nã, akmere ar, àpnhĩre ar, ar abê Metĩndjwýnh nhõ me mextireja, Metĩndjwýnh kute kãjkwa kadjy gwaj baro'ã amijo gwaj bapytãr, on ar Jejukôt ajamak bẽn. Ê, dja ba ar amã Jeju rax jarê. Arým ne Metĩndjwýnh me bawýr Krabê Jeju jano, me bakadjy ano nhym bõx. Ne kam mrãmri ne kubê me banhõ Metĩndjwýnh mar djwýnh nhõ bẽnjadjwýr rax. Tãm ne gwaj tu amim kamnhĩxkumrêx ne kam memã arênh ar o baba. ²Nhym kam Jeju bõx ne kum àpênhkumrêx ar ba. Metĩndjwýnh kute anorjamã àpênh ar ba ne kanga kêtumrêx. Kute Môjdjê pyrãk. Môjdjêdjwý ne prĩne kute anor djwýnhjamã àpênh ar ba ne Metĩndjwýnh nhõ me jao ban meo djuw mexkumrêx ne kute me kanga kêtumrêx.

³Nhym bep Jeju ne Môjdjê kurãm rax ne. Kam dja me mã abenmã Jeju pymamê rax jarênh ar o ba. Ga me kute amim kikreja pumũ. Kikre nhipêx djwýnh ne raxo, tỳxo kikre jakre. Nãm ã Jeju kute kikre nhipêx ar o ba prãbê Môjdjê nhipêxo ane ne kam raxo Môjdjê jakrenh mex ne. ⁴Nhýnh ne kikre 'õ ta kute aminhipêx got? Kati, kikre 'yr djwýnh ta ne ikrao kikre 'y. Bir be, nãm ã Metĩndjwýnh mýjja kunĩ 'yro ane. Nã, mýjja kunĩ nhipêx djwýnhbê ne Metĩndjwýnh. Ta ne Môjdjêdjwý nhipêx ne.

⁵Mrãmri ne Môjdjê prĩne Metĩndjwýnh nhõ me ja kunĩo ban meo djuw mexkumrêx ne kute me kanga kêt ne memã Metĩndjwýnh kute amũ tũmrãm amikukràdjão amirĩtja kajmã'ã memã arênh ba. Kubê Metĩndjwýnh nhõ àpênh. Ô àpênh kajgo.

⁶Nhym bep Kritu kubê Metĩndjwỳnh kra. Kubê Metĩndjwỳnh kra ne ta ò me jao ban prĩne meo djuw mexo ban kute me kanga kêtukumrêx. Ê, gwaj ba ne gwaj babê ta ò me ja. Nhym Metĩndjwỳnh arỳm gwaj bamã mỳjja mex dji. Gwaj batĩn prãm kêt ne baje amim kamnhĩxbê mỳjja mexja kam amak ne kam bakĩnh rã'ã jabejmã. Dja gwaj o anhyro bamor ne inomã mênh jabej babê ta ò me ja.

Me amakkre kêt ne ar ba nêje memã kabên.

Kô k 10.1; Djuda 5

⁷⁻⁸Kam ne Metĩndjwỳnh Karô memã kum,

“On me akati jakam on aje Metĩndjwỳnh kabên mar jabej gê on wãm ajamakkre kêt on wãm nõ.

Amrêbê ne me akukãmãre amakkre kêtukumrêx ne kapôt kukritkam jãm Metĩndjwỳnh akêx ne 'ã kabên ne. Me kute ngryk jabejmã ne me,

‘Kati, Metĩndjwỳnh dja me bajo bikênh kêt. Dja gu me te kam amikrà ar o baba nhym me bajo bikênh kêt. Kute me bajo krakam dja tu ate krã’, ã ar anhyr ba.

Nãm me ã me kute Metĩndjwỳnh ngryk jabejmã ã ane.”

Nãm ã Metĩndjwỳnh ane ne kam ajte memã kum,

⁹“Nã, wãnh ne me akukãmãre kute amim ikakinhmã, kute ingryk jabejmã ar ikam amikrà:o ba. Nã bãm te me nokam memã mỳjja kwỳo amirĩt ar o iba nhym me ãm ate kute we ingryk jabejmã ar we ã anhyr ba. Me kute we ingryk jabejmã 'ã amexbê 40.

¹⁰Kam ne ba me jakam ingry:ky ne memã kum,

‘Mrãmri ne me ja ajte ikam amikràn ibê binhirênh mō. Ne ikabên mar prãm kêtukumrêx’, ane.

¹¹Kam ne ba ingry:ky ne mrãmri ikabên pydjĩn arê. Nã bãm memã kum,

‘Aj, me ja dja me inhō pyka'ỳr bōx kêtukumrêx ne ikôt me tyk djã kêt djakam tyk djã kêt kêtukumrêx’, ane.”

Nãm ã Metĩndjwỳnh kabên ane.

¹²Ê, akmere ar, àpnhĩre ar, kam ne ba ar amã, gora ar amijãno dja. Ar akadjwỳnhbê ajaxwe 'õ, apunu 'õ ar akam kator ga kam arỳm ar aje amim Jeju kamnhĩx kêt ne aje Metĩndjwỳnh tĩnja kanga karô dja gar mrãmri amijãno dja.

¹³Kwãrĩk wãnh gar amikam ajamak kêt kati kêt. Dja gar akati kunĩkôt abenmã akabên ne o abenmã tỳx jadjà. On akati jakam, Metĩndjwỳnh kute ar amã,

—On jakam, anhyr ja ma. Metĩndjwỳnh kute me amakkre kêtoto tỳm kêttri. Gêdja mỳjja punu 'êxri kute mex pyrāk ne arỳm ar anoo akno. Kute ar anoo biknor gar ajamakkre kêt karô dja gar on abenmã tỳx jadjà.

¹⁴Gwaj bakunĩ baro'ã babê Kritu nhō me ja dja gwaj 'ã bangrà tỳx. Amrêbê gwaj baje amim kamnhĩx nyrekam batỳxja dja gwaj o batêm rã'ã o tẽn o tẽn o tẽn inomã kumê. Gwaj gop mrãmri ã o anhyr jabej kam arỳm babê Metĩndjwỳnh nhō me jakumrêx.

¹⁵Bir be, on dja gar ã amijo ane. Ga Metĩndjwỳnh Kabên kute,

“On me akati jakam on aje Metĩndjwỳnh kabẽn mar jabej gẽ on wãm ajamakkre kêt on wãm nõ.

Amrêbê ne me akukãmãre amakkre kêt kumrêx ne kapôt kukritkam jãm Metĩndjwỳnh akêx ne 'ã kabẽn ne”, anhỳrja pumũ.

¹⁶Nhỳnh me ja ne me Metĩndjwỳnh kabẽn mar kajgon kam jãm o akêx ne? Je kum Mõjdjê kute pykabê Edjitu kurũm meo kator ne kute meo baja kunĩ, me tãm.

¹⁷Nhym nhỳnh me ja ne Metĩndjwỳnh mekam ngryk ne? Mekam ngryko tẽm rã'ã'ã amex krãptĩbê 40? Je kum, me tãm, me kute Metĩndjwỳnhkam amikrão ba ne kam wãnh kapôt kukritkam apỳnh rôrôk ban wãnh tyko ikwã, me tãm.

¹⁸Nhym nhỳnh me ja'ã ne Metĩndjwỳnh memã kabẽn pydjĩn arê ne memã kum,

“Aj, me ja dja me inhõ pyka'ỳr bõx kêt kumrêx ne ikôt me tyk djã kêt djakam tyk djã kêt kêt kumrêx”, ane.

E kum me tãm, me kute Metĩndjwỳnh kabẽn mar kêt ne ar baja, me'ã ne ane.

¹⁹Bir be, ga me kute amim Metĩndjwỳnh mar prãm kêt kam 'ỳr bõx kêtja pumũ.

Metĩndjwỳnh memã me tyk djã kêt djã jarẽ.

4 ¹Ê, gwaj amijãno dja. Gwaj bajõ 'ỳr babõx kêt karõ dja gwaj amijãno dja. Metĩndjwỳnh kute õ pyka'ỳr memã krãn kute memã tyk djã kêt djã jarẽnhja tãm ne gwaj bamã nõr rã'ãã. Kam dja gwaj amijãno dja, gwaj bajõ 'ỳr babõx kêt karõ. ²Ê, 'ã ujarẽnhja, 'ã ujarẽnh mexkumrêxja ne arỳm gwaj bawỳrdjwỳ bõx, gwaj arỳm me kudjwa kuma. Me bakukãmãre kumrêx 'ỳr bõx nhym me kuma. Nãm me mar kajgokumrêx ne. Djã nãm me kuman amikajmã'ã tu kamnhĩxkumrêx? Kati, nãm me ãm mar kajgon ate krã. ³Nhym bep gwaj ba ne gwaj baje tu amim markumrêx ne baje amijã kamnhĩxkumrêxja, gwaj ba dja gwaj 'ỳr babõxkumrêx ne kam kam batyk djã kêt ne. Nhym bep me amakkre kêt'ã ne Metĩndjwỳnh memã kum,

“Nã bãm ingy:k ne mrãmri ikabẽn pydjĩn arẽn memã kum,

“Aj, me kute ikabẽn mar kêtja dja me inhõ pyka'ỳr bõx kêt kumrêx ne ikôt me tyk djã kêt djakam tyk djã kêt kêt kumrêx”, ane.”

Djãm kam me tyk djã kêt djã kêt got me 'ỳr bõx kêt mã. Je kum amrêbê ne Metĩndjwỳnh pyka nhipêxo tẽn inomã kumẽn kam me kukãm tyk djã kêtmo krax ne te memã tyk djã kêt djã jarẽn te mekam ama. ⁴Be, Metĩndjwỳnh kabẽnkam ne pi'òk rãrãr'ã memã,

“Nãm pi'òk tyk to ino rerkam àpẽnho ino ren kam pi'òk rãrãrkam tyk djã kêt nõ”, ane.

⁵Ne kam ajte me tyk djã kêt djã jarẽ, ne,

“Aj, me ja dja me inhõ pyka'ỳr bõx kêt kumrêx ne ikôt me tyk djã kêt djakam tyk djã kêt kêt kumrêx”, ane.

⁶Me bakukãmãre kumrêx kute 'ã ujarẽnh mar kajgoja me tãm ne me 'ỳr bõx kêt kumrêx, me kute amim Metĩndjwỳnh mar kêt kam. Tãm, me tyk djã kêt djã, ne arek me ja kadjy nõr rã'ã, atemã me ja kadjy nõr rã'ã.

⁷Kam ne Metĩndjwỳnh ajte akati 'õ jarẽ ne memã,

“Akati jakam on ajamakkre kêt wã on wãm nõ ga me ikabên man kam ikôt atyk djà kêt djà'ÿr bôx.”

Nãm amũ tũmrãm Dawimã kabên nhym ô'ã memã arẽ, ajbir ije me amã arẽnhja tãm, ne memã,

“On me akati jakam on aje Metĩndjwýnh kabên mar jabej gẽ on wãm me ajamakkre kêt on wãm nõ”, ane.

⁸Bir be, nãm ren Djodjuwe ren me tyk djà kêt djà'ÿr meo bôx nhym ren Metĩndjwýnh ren ajte tũmrãm akati 'õ jarẽnh kêt kumrẽx, me tyk djà kêt djà kadjy akati 'õ jarẽnh kêt kumrẽx.

⁹Nhym bep kati, 'ÿr kute meo bôx kêt kam memã nõr rã'ã. Metĩndjwýnh nhõ me ja kadjy, kadjy ne nõr rã'ãã, gwaj bamã nõr rã'ãã. Kute pi'òk rãrãrkam Metĩndjwýnh kòkam kòto nõr ja pyrãk. Dja gwaj ã kudjwao ane. ¹⁰Kòt dja gwaj badjãpẽnh jakàn kam Metĩndjwýnh kudjwa bakòkam kòto banhikwã. ¹¹Ajrã, gora gwaj batýx ne kudjwa 'ÿr bôx ne kudjwa bakòkam kòto nõ. Gwaj bajõ baje me bakukãmãre'ã amijakren bajamakkre kêt ne arĩk ar baban 'ÿr babôx kêt karõ ne ba ar amã, —Gora gwaj batýx ne kudjwa 'ÿr bôx, ane.

¹²Djãm Metĩndjwýnh kabên kajgo got. Kabên kute mýjja tĩn ne ãdjõnh pyrãk. Dji tĩnkêt. Dji kute mýjja kyxkêt. Ga mrãmri me kute kàx aktã irẽkòt prĩne wa ngrãnh nhym kute mýjja kyx týxja pumũ.

Nãm ã Metĩndjwýnh kabên kute kàx pyrãk ne wa mexo kàx jakrenh mexo ane. Mrãmri me kute kàx djwa mexo mrymã ukabêr ne kute o mry toprik ne kute amũ katàt o 'i jakàn nhym kre kamrẽk ne ikwã nhym 'i kanhĩnja amirĩt mex ne ikwãja pyrãk.

Nãm ã Metĩndjwýnh kàx'ã amikabên jakreo ane ne kabẽno ã gwaj bajo ane. Nãm ta kabẽno gwaj bakadjwýnhbê prõt ne gwaj badjumar djã'ã kurẽn gwaj bakamũnho ane. Ne kam gwaj banhòkre kadjwýnhbê baje amim mýjja'ã karõja, baje mýjja mar ar o babajao amirĩt ne mýjja kabi. Gwaj Metĩndjwýnh kabên mar ar o baba nhym Metĩndjwýnh gwaj badjumar djãkam gwaj bamã kabên ne, —Mexkumrẽx, ikabẽnkòt ne ga amijo aba, ane.

Nàr kon,

—Ë, nã gãm aje ikabẽnkòt amijo aba kêt, ane.

Nãm ã Metĩndjwýnh Kabên kute kàx pyrãk ne gwaj bakadjwýnhbê: prõto ane. ¹³Bir be, nhýnh ne mýjja 'õ Metĩndjwýnhbê apdu? Arkati, kute mýjja nhípẽx kunĩ ne amirĩtkumrẽx ne nõ. Irãri kum nõ. Noo kute mýjja kunĩ pytãr. Kumã dja gu me amijarẽ, kubẽ mýjja 'õ biknor kêt kumrẽx.

Metĩndjwýnh mar djwýnh nhõ bẽnjadjwýr rax'ã ujarẽnh.

¹⁴Ije ar amã arẽnh ja ma. Ije õbê ar amã Jeju rax'ã idjujarẽnhja dja ba akubyn ar amã arẽ. Gora gwaj baje amim Jeju mar ne 'ã ar memã badjujarẽnh babaja gora gwaj 'ã bangrà týx. Ga gwaj banhõ Metĩndjwýnh mar djwýnh

nhô bēnjadjwỳr ra:xja pumũ. Nām kàjkwamã wadjàn amũ kajônkhôt katon kam ýtã Metĩndjwỳnh'ỳr bôx. Kubê ne Jeju. Kubê ne Metĩndjwỳnh kra.

¹⁵Gwaj banhô Metĩndjwỳnh mar djwỳnh nhô bēnjadjwỳr rax djukapřikumrēx. Djām kute gwaj barerek mar kêt got? Kati, nām te Xatanaj axwe'ã kum apnê nhym ãm tu ate krã. Gwaj apỳnh bajaxwe djàri kute 'ã gwaj bamã ãpnênh, 'ã ne kum apnê nhym ãm tu ate krãn axwe kêtikumrēx ne.

¹⁶Bir be, gora gwaj amikam bapijàm kêt ne tu Metĩndjwỳnhmã amijarē. Ôdjànkhkumrēx gwaj kam tu kum amijarē. Dja gwaj bakam ukapřikumrēx. Gêdja mỳjja kute ar gwaj bajo baja, gwaj bajaxwe, gwaj barerek, gwaj bakapřĩ, gwaj batĩn prãm kute ar gwaj bajo baja, kam dja gwaj tu bapijàm kêt ne Metĩndjwỳnhmã amijã ajarē nhym kam ta ukapřikôt prĩne gwaj bajo djuw mexkumrēx ne.

5 ¹Ē, Metĩndjwỳnh kute amim me kadjy Metĩndjwỳnh mar djwỳnh nhô bēnjadjwỳr rax, bēnjadjwỳr bēngôkre 'ô^c djarmãja pumũ. Kute amim 'ô djar kadjy ne amijo me bajô, me babēngôkre 'ô pytàn amim kudja, nhym kam ta, me kadjy Metĩndjwỳnh mar djwỳnh ta ne me ô'ã Metĩndjwỳnh ma. Nhym me kàtãmja amijaxwe pãnh me kadjy Metĩndjwỳnh mar djwỳnhjamã mryo mrãn kungã nhym me axwe pãnh Metĩndjwỳnhmã kubô, me ô'ã kubô. Nhym kam Metĩndjwỳnh me ja jaxweo ajngràn tu o akno. Nām ã me kadjy Metĩndjwỳnh mar djwỳnh memã Metĩndjwỳnh maro ane.

²Djã nām me no kêtja, me kute Metĩndjwỳnhbê ikô mătjamã àkrēmã got? Kati, adjwỳnhdjwỳ axwe prãm kam mekam ukapřĩn memã àkrê kêt ne tu memã kabēn rerek jarē. ³Ne ta me kudjwa axwe prãm kam adjwỳnhdjwỳ ta amijaxwe pãnh kum mry bô. Djã nām me ajbit axwe pãnh kum mry bô? Kati, ta, adjwỳnhdjwỳ amijaxwe pãnh kum mry bô.

⁴Djã nām me kadjy Metĩndjwỳnh mar djwỳnh nhô bēnjadjwỳr ta amijã bēnjadjwỳr rē got, ta o amiptàn amijã me kadjy Metĩndjwỳnh mar djwỳnh nhô bēnjadjwỳr rē got? Kati, Metĩndjwỳnhbit ne amijo utàn amim 'ã bēnjadjwỳr rē ne amim umjuw. Ga Metĩndjwỳnh ajbit kute Arão'ã me kadjy Metĩndjwỳnh mar djwỳnh nhô bēnjadjwỳr mēnhja pumũ. Metĩndjwỳnhbit ne me'ã bēnjadjwỳr rē.

⁵Bir be, nām ã Kritudjwỳ o ane. Ta kute amijo rax ne kute o amiptār ne amijã me kadjy Metĩndjwỳnh mar djwỳnh nhô bēnjadjwỳr rax mēnh kêtikumrēx. Nhym bep kati, Metĩndjwỳnh ta ne amim kudjan kum,

“Mrãmri abê ikrakumrēx. Jakam ne ba arỳm ajo ikrakumrēx ga amipãnh ijo Abãmikumrēx”, ane.

Nām ã Metĩndjwỳnh nhô pi'ôk no'ôkkam ã kum ane. ⁶Ne kam ajte kum, “Abê me kadjy Metĩndjwỳnh mar djwỳnh rã'ã rã'ã rã'ã ne.

Merkixatek ne akajmã'ã Metĩndjwỳnh mar djwỳnh.

Ga kam Merkixatek nhijuk'ã gadjwỳ abê me kadjy Metĩndjwỳnh mar djwỳnh”, ane.

^c 5.1 Apỳnh me ô pyka djàri kunĩkôt ne me kunĩ bēngôkre.

7Mrāmri ne Jeju me kurām me kadjy Metīndjwŷnh mar djwŷnh mexkumrēx. Kute amijo kubēngōkren^d pykakam ar bari Metīndjwŷnhmā kabēn ne amijo a'uw. Kàj bē kum kabēn ne amra. Metīndjwŷnh pydji kute tykbē utār kadjy nārām kum kabēnkam muw. Nhym Metīndjwŷnh arŷm kabēn ma, Jeju jaxwe kêt ne kute Metīndjwŷnh kabēn mar ne kôt ar amijo bakam Metīndjwŷnh arŷm kabēn ma.

8Be, djā nām kubē Metīndjwŷnh Krakam kute tokrymē kaprī mar kêt got? Kati, nām te kubē Metīndjwŷnh kra, te axwe kêt ne mā tokry man kaprī ma. Nām tokry katikôt Bām kabēn man kôt ar amijo ba. Te tokry nām Bām kabēn mar 'āno dja. Kam ne kute kabēnkôt ar amijo baja mar mexkumrēx. 9Ne kam arŷm mrāmri tokryo ino re. Tokryo ino ren kam arŷm kubē me utār djwŷnhkumrēx ne. Me kute Jeju kabēn mar ne kute kôt ar amijo ba, me ja ne me utān kam kute ar meo ba rā'ā rā'ā rā'āmā.

10Be, kute me utār kumrēx ne kute meo ba rā'ā rā'ā nhym kam kôt Metīndjwŷnh kum,

“Abē me kadjy Metīndjwŷnh mar djwŷnh nhō bēnjadjwŷr rax.

Merkixatek nhijuk'ā gadjwŷ abē me kadjy Metīndjwŷnh mar djwŷnh nhō bēnjadjwŷr rax”, ane.

Nām ā Metīndjwŷnh kute amim arkam ā kum ane.

Me abatānh kute me prīre pyrāk.

Kô k 3.1; Ep 4.14

11Nā bām bit ar ije ar amā Merkixatek jarēnhmān kam ajte akubyn ar amā arēnh kêt. Nā bām ren ar ar amā kunī jarē ga ren ar mar kêt kumrēx ne, ar ajamakke kêt kam, ar ajamak'ā tomkam. Dja gar on amijamak'ā tom tan gop mŷjja ma. 12Nā gām ar amrēbē memā Metīndjwŷnh kabēn'ā adjujarēnhmān ajte mar kêt ne.

Nhym bep kati, me'ō gēdja akubyn ar amā Metīndjwŷnh kukrādja kraxkôt arē. Nā gām ar aje me bixadjwŷr ny pyrāk. Me bixadjwŷr ny ne me kute kà kaōrbit mar ne kute me ōkumrēx kur kêt. Gar gadjwŷ aje mŷjja mar kêt rā'ākam aje me bixadjwŷr ny pyrāk. 13Ar aje mŷjja mar kêt kam aje me prīre pyrāk. Ar aje kà kaōr rā'ā. Nhym bē ne ga gop ar ajabatānhkam aje gop mŷjja mar. Ar aje Metīndjwŷnh kabēn katātja o amiprāk kêt rā'ā.

14Bep ate ne me abatānh. Me abatānh ne me kute me ōkumrēx kur. Nā gām ar ren Metīndjwŷnh kabēn maro tēn ren o amiprāk ne ren arek maro tēn o tēn o tēn ren marja amū o abikamēnho tēn kam ren aje me abatānh pyrāk ne kam ren prīne ren mŷjja kabi, prīne mŷjja punumē mŷjja mexmē prīne ren kabin mŷjja man kam ren aje me abatānh pyrāk.

^d5.7 Kritu ne amijo kubēngōkre kute mrāmri ne apŷnh me ō pyka djāri kunīkôt me kunī: bēngōkreja pyrāk. Kubē kà jakamē me kakrātykmē me babēngōkremē ne me kunī: bēngōkre. Me kamrōmē me kukrādja kunī kubēngōkreo aben pyrāk. Jakam dja ga Karō 17.26 jarēn ama.

6 ¹⁻³Gwaj Kritukôt babikamênho kraxkam arým Kritu kukràdjà kwỳ ma. Nãm me Kritu kukràdjà kraxbit gwaj bamã arê gwaj kuma. Mỳj kukràdjà krax ne gwaj arým kuma?

Me batyk kadjy bamã bajaxwe kínhja wánh kum banhirer ne kam baje amikajmãtã Metĩndjwýnh mar ja. Nhyr ajte me kute ngômã me bajangjênh'ã ujarênhjadwỳ. Ne kam ajte me kute Metĩndjwýnhmã me bapymjýr gu me kum badjâpênh kadjy me kute me bajã ikra jadjwýr ja. Ne kam ajte me batyk ne akubyn batĩn ne bakator nhyr Metĩndjwýnh kute me bamã bajaxwe pánh jarênhmã ne kute me jamã me tĩn rã'ã rã'ãmã arênh ne ate me jamã me biknor rã'ã rã'ã jarênh ja. Ja ne mar tũm, kukràdjà krax.

Djãm ajbit ne gwaj baje marmã? Kati, kwỳ rax ne gwaj baje mar kêt rã'ã. Gwaj on ajte amũ ijukri on mỳjja 'õdjwỳ man gop amũ maro babikamênho mō. Nã gãm ar te o anen te aje kãmã mar kamênhmãn kam mã akubyn ama, akubyn kraxbit maro mō.

Nhyr bep kati, dja gwaj on amũ ijukri on mỳjja 'õdjwỳ ma. Gwaj baje mỳjja marmã ne Metĩndjwýnh amim gwaj bajã karō, gwaj on kuma, kute gwaj bamã no mex jadjãr jabej dja gwaj on ã o ane.

Me kute Metĩndjwýnhbê amijo akẽx karō memã kabẽ.

Idja 10.26

⁴Nhyr bep ate ne me kute Jeju kangaja. Tō mã dja me me on akubyn Metĩndjwýnh'ýr meo akẽxmã? Kati, gẽdja me te meo ane. Arým ne Metĩndjwýnh me ja no bõnh pydji nhyr me arým amim kuma. Jeju kute me utãrmã kãkwa kurũm bõxja ne me arým amim kuma. Nhyr Metĩndjwýnh ta memã Karōja ngrã nhyr meo ba. ⁵Nhyr me kam arým mrãmri Metĩndjwýnh Kabẽ mexkumrẽxmã kato. Ne arým amim mỳjja puma kwỳ pumũ. Jeju akati 'õkam akubyn bõx ne kute meo ba kajmã'ã mỳjja pymaja kwỳ pumũ. Omũnh kajgon kam ate amibẽ kanga, amibẽ kurẽ ar o ba.

⁶Be, me ja, me kute bit amim Jeju marmãn ajte jãm kute kubẽ amijo akẽx ne kangaja, djãm me kute akubyn Metĩndjwýnh'ýr meo akẽxmã? Arkati, gẽdja me te meo ane, dja me te akubyn 'ýr kute meo akẽxmã te meo ane. Mýkam? Bir, me kute Jeju kangaja ne me o ajkẽ. Nãm kute mrãmri ne me kute Metĩndjwýnh krao bikênh ne kute akubyn pĩte'y'ã nhõrkam o bikênhja pyrãk. Nhyr kam me kãtãm Jeju japrýo kumex.

⁷Ê, gop ar pyka mexja pumũ. Na ne pyka jakam bixadjwýr krãptĩ ne kam amũ pyka ja mã prõt ne. Nhyr me kam kam mỳjja kren prĩne 'ã karên o djuw mex nhyr kam ingrõt ne abatãnh. Õ wýnh kute krên ne tỳxmã ne ingrõt ne ôn kumex. Pyka mex ne ja. Pyka mex ja ne Metĩndjwýnh arým kum kính ne õkre kadjwýnhbê amim,

—Pyka ja ne mexkumrẽx. Ba kum kính jadjã ne kum djwỳ jarẽ gẽ mã arek kam djwỳ nhingrõt ne ôn kumex, ane.

⁸Nhym bep ate ne pyka punu. Nãm te na axidjuw nhym me te karê nhym mã mrÿnhĩmẽ mjêxêtte nhĩbit apôx ne kumex. Pyka kajgo mexi. Me te kam mÿjja nhingrôt jabej, djwÿ nhingrôt jabej ne kam ôkre kadjwÿnhbê amim,

—Axuk wãnh nôre. Ba tu kanga gê wãnh nôre. Mÿj kadjy dja ba prĩne karên 'ãno dja? Gê me'ô tu kum adjà gê prĩne xê. Kê, ane.

Dja ã Metĩndjwÿnh me kute akubyn kubê akêxjamã anen kuwyo imôkam me kurê.

⁹E kum ar ga, akmere ar, àpnhĩre ar, ar imã ar akĩnhja, djãm ar amã ne bar ikabên ja jarênho iba? Kati, arÿm ne bar ar amexkôt ar ama. Ar ga ne gar tu amim Jeju markumrêx nhym arÿm ar apytã. Ga kam ar aje pyka mexja pyrãk.

¹⁰Djãm Metĩndjwÿnh punu got. Djãm kute ar amar kêt got. Kati, dja katãt ar adjãpênh man o biknor kêt ne. Nã gãm ar amã Metĩndjwÿnh kĩnhkumrêx ne kam ô'ã ô me mex jadjwÿo djuw mex ar o aba. Ne arek ar o aba rã'ã ne. Kam dja Metĩndjwÿnhdjwÿ ar amar rã'ã ne.

¹¹Bir be, gora ar 'ãno dja. Nã bãm ar inhôkre kadjwÿnhbê,

—Gora gê ar ĩ pÿnhkôt kum Jejuwã kĩnh ne kam kĩnh rã'ã rã'ãn kôt ar amijo ban inomã kumê, ane.

Nã, dja gar ã anen inomã amên kam arÿm 'ÿr bôx. Ar aje amim kam amakja ne aje amim kamnhixja arÿm 'ÿr bôx.

¹²Nã, gora ar amã adjukanga kêt ne 'ãno djan inomã amên kam 'ÿr bôx. Kwãrik wãnh ar amã adjukanga kêt. Ê, me kute amim Jeju mar ne kute akrãn mã arek amiwÿr kam amakja, me tãmbit dja me 'ÿr bôx. Mÿjja mex, Metĩndjwÿnh kute 'ã memã katãt kabên pydjĩn arênhja'ÿr dja me bôx. Bir be, gora on ar ja'ã amijakren me kudjwa mÿjja ja kunĩ 'ÿr bôx.

Metĩndjwÿnh kute Abraãomã tãmdjwÿ jarênh mãmdji.

¹³⁻¹⁶Ar me bakukãmãrebê Abraãoja pumũ. Amrêbê Metĩndjwÿnh Abraãomã kabên pydjĩn arê. Nãm kum,

“Ê, mrãmri dja ba ajo kĩnh ne amã atãmdjwÿ krãptĩ ngã nhym aptãn kumex.

Ba ibê Metĩndjwÿnh ne ba amã ikabên. Mrãmri ne ikabênja”, ane. Be, Metĩndjwÿnh kute Abraãomã kabên pydjĩn arênh ne ja. Nãm Abraão akrãn mã arek amiwÿr kam aman kam 'ÿr bôx. Metĩndjwÿnh kute kum kabên pydjĩn arênhja'ÿr bôx ne arÿm kran arÿm tãmdjwÿ.

Me babêngôkre baje memã bakabên pÿnh ne arênh kadjy ne atemã me'ô'ÿr mrã. Me'ô kute raxo me bajakrenh ne kute me bakabên marmã 'ÿr tẽn kum arê, kute adjwÿnhdjwÿ me bakabên mar ne kute ar o bamã. Gu me kum bajêx karô, kum bajêx nhym kute o ngrykmã ajte atemã me'ô'ÿr mrãn kum me bakabên ja jarê.

Nhym bep Metĩndjwÿnh kute Abraãomã kabên pydjĩn arênhkam nhÿnh ne atemã me'ô Metĩndjwÿnh kurãm rax got kute adjwÿnhdjwÿ kabên marmã? Kati, Metĩndjwÿnhbê kumkati pydjii. Kam ne ta tu aminhidji jarên Abraãomã kabên pydjĩn arên kum,

“Ê, mrāmri dja ba ajo kīnh ne amã atãmdjwỳ krãptĩ ngã nhym aptàn kumex. Ba ibê Metĩndjwỳnh ne ba amã ikabẽn. Mrāmri ne ikabẽnja”, ane. 17 Nãm kabẽn pydjĩn arẽn kam ta aminhidji jarẽ. Nãm arỳm 'ã amim karõn kôt kabẽn pydjĩn arẽ. Nãm akubyn atemã kabẽn 'õ jarẽn kêt kumrẽx. Nãm ta arỳm amim pry pydji jarẽ. Ne kam me kute prĩne amim mar tỳxmã, Metĩndjwỳnh kute memã kabẽn pydji jarẽn nhym me kute amim mar tỳxjamã ne kabẽn pydjĩn arẽn kam ta memã aminhidji jarẽ.

18 Bir be, kumrẽx ne kabẽn pydjĩn arẽn kam adjwỳnhdjwỳ ta aminhidji jarẽn memã,

—Ba ibê Metĩndjwỳnh dja ba ajo kīnh, ane.

Dja akubyn atemã kabẽn 'õ jarẽn kêt kumrẽx ne. Dja 'êxnhi kêt kumrẽx. Djãm Metĩndjwỳnh kabẽnkam 'êxnhi kute akubyn memã kabẽn 'õ jarẽn hmã got. Arkati. Kam dja gar ja man kam ajte atỳxkumrẽx, ajte akĩnhkumrẽx. Atỳx ne tu amim kamnhĩxkumrẽx ne mã kam ama. Metĩndjwỳnh arỳm gwaj bakukãm gwaj bamã mỳjja mex jarẽ gwaj mã kam ama. Kute gwaj bapytarmã ne gwaj arỳm 'ỳr baprõt nhym arỳm gwaj bapytàn gwaj bamã mỳjja mex jarẽ, kàjkwa jarẽ.

19 Gora gwaj kam batỳx ne tu amim kamnhĩxkumrẽx ne mã kam ama. Mrāmri dja gwaj 'ỳr bõx. Kam ne gwaj bakadjwỳnhbê badjumar mex ne baku'ê tỳx ne. Mrāmri ne me kute ngômã kẽn rẽn nhym kã arek arij tỳx nhym ngô kute o ba kêt ja pyrāk. Dja gwaj ã bakadjwỳnhbê badjumar mex ne batỳxo ane. Gwaj baje amim Metĩndjwỳnh kabẽn kamnhĩx ar o babakam dja gwaj ã bakadjwỳnhbê badjumar mex ne batỳxo ane.

Metĩndjwỳnh nhõ kikreti ja ma. Kadjwỳnhbê Metĩndjwỳnh nhõ mỳjja nêje kubêkati wajêt. Nhym me kadjy Metĩndjwỳnh mar djwỳnh nhõ bẽnjadjwỳr raxbit 'ỳr ngjẽn.

20 Nhym bep Jeju ne ta kàjkwakam ũrkwāti djwỳnhjamã wadjà. Me bakukãm ne 'ỳr wabin kum wadjà. Kute me banhirār ne me bajo djuw mex ne me bakadjy Metĩndjwỳnhmã kabẽn mã. Dji kubê Metĩndjwỳnh mar djwỳnh djwỳnhkêt. Kubê Metĩndjwỳnh mar djwỳnh nhõ bẽnjadjwỳr rax dja rã'ã rã'ã ne. Merkixatek ne kajmã'ã Metĩndjwỳnh mar djwỳnh nhym kam Jeju ijuk'ã kubê Metĩndjwỳnh mar djwỳnh ne me bakadjy Metĩndjwỳnhmã kabẽn ne.

Jeju kute raxo Merkixatek jakrenh.

7 1-3 Be, mỳj me'obê ne Merkixatekja? Nãm krĩbê Xarêkam me ja nhõ bẽnjadjwỳr ne adjwỳnhdjwỳ kubê Metĩndjwỳnh pymao kubê kumkati mar djwỳnh. Idji kutewa ne katàt me mrānh nhõ bẽnjadjwỳr, Merkixatek. Idji jatāri jadwỳ ne me umar mex nhõ bẽnjadjwỳr. Krĩ nhidjibê ne Xarê. Me umar mex ne ar bakam ne me tu 'ã kum idji. Me õ bẽnjadjwỳrjamã, Merkixatekmã ne me me umar mex nhõ bẽnjadjwỳr ane.

Ije nhym mã ne bāmmẽ nã ar kute? Kati, e kum bep me kute bāmmẽ nã noo ar omũnh kêt kumrẽx ne me kute ar arẽn kêtê. Kon ne. Ingêtmẽ kwatynhmẽ me kute omũnh kêt mexi. Me kute rwỳkkôt mar kêt, nã 'õ kurũm rwỳkkôt

mar kêt ne ajte kute tyk djâ kôt mar kêt-kumrêx. Nãm tu nhĩ'ãnh tẽ. Kute Metĩndjwýnh Kra pyrâk ne me kadjy Metĩndjwýnh mar djwýnh rã'ã rã'ã ne.

Be, ta ne Abraão kutã tẽn kajpan kum kabẽn jarẽnho kĩnhkumrêx ne. Abraão arým mýj bẽnjadjwýrja ar'ýr prôt ne ar kubĩn kam akubyn tẽn nhyh Merkixatek kutã tẽn kajpan o kĩnh ne.

Nhyh kam kum mýjja kwýo ajkij. Kute mýjja kwýo mórjao ajkij nhyh mã o mỗ. Abraão ỏ mýjja kunĩ kryre ne kurẽn aben kadjy kum kungã. Merkixatekmã apýnh aben kadjy o pỏxo tẽn kum kungã nhyh abenã rẽnhkam arým rax nhyh kam mã o mỗ.

⁴Bir be, me Merkixatek raxja pumũ. Te Abraão bẽnjadjwýr rax ne kute nẻkrẻx pytảrja tu kute kum kwý o bikẻrja pumũ. Djẳm Merkixatek ngri got.

⁵Atũmã ne mekbẻ idjaer me ỏ mýjja jamýnh ba. Mỏjdẻ ne kukrẻdjẻkỏt mekbẻ idjaermã kum,

—Gora me amũ anẻỏ mýjja wã kwýo ajkẻn amũ mekbẻ Rewibẻ me kadjy Metĩndjwýnh mar djwýnhmã angã, amũ amikutã memã kwý ngả gẻ me ta ỏ nẻkrẻxkỏt amim amý, ane. Nhyh me kam ả anen ỏ mýjja kwýo ajkijn kam amũ amikutã mekbẻ Rewimã ỏro tẻ, me ta ỏ krỏkam me jamã kungã nhyh me amim amý. Amẻ kubẻ Abraão tẻmdjwý nhyh mekbẻ Rewi kute amim amýnhja tẻm ne kubẻ ỏ nẻkrẻx.

⁶Nhyh bep atemã ne Merkixatek. Mekbẻ Rewi 'ỏ kẻtẻ. Nãm te kubẻ mekbẻ Rewi kẻt ne kam tu Abraỏobẻ nẻkrẻx kwýo ajkijn kum kĩnh jadẻ. Metĩndjwýnh arým Abraỏomã kabẽn pydjịn arẻn kum mýjja mex jarẻ nhyh Merkixatek arým kuman kam kỏt Abraỏoo kĩnh ne. ⁷Be, mẳmri ne me'ỏ kute meo kĩnhja ne raxo tẻmja jakre. Me rủnh ne me meo kĩnh.

Kam ne ba ar amã,

—Me Merkixatek raxja pumũ.

⁸Mekbẻ Rewibẻ Metĩndjwýnh mar djwýnh ne me ỏ nẻkrẻxo ba. O ban kẻt nhyh me pẻnh kamingrẻny amũ ijuk'ả ajte Metĩndjwýnhmã ảpẻnh ba nhyh me ajte memã ỏro ba. Nhyh bep Merkixatek pydji ne tẻn rả'ả rả'ả ne kubẻ ỏ mýjjao mỗ. Ga me Metĩndjwýnh nhỏ pi'ỏk no'ỏkkam Merkixatek'ả kute tẻn rả'ả: rả'ả, anẻýrja pumũ. Be, Merkixatek raxja pumũ.

⁹⁻¹⁰Nhyh kam Merkixatek Abraỏo kutã tẻn kaja nhyh kum ỏ mýjja kwýo ajkij nhyh mã o mỗ. Nhyh kam Rewidjwý kute kum ỏr pyrâk. Rewibẻ ne Abraỏo tẻmdjwý. Rewi ne ingẻt kukẻmẻrebẻ Abraỏo ngrekam nỏr rả'ả, kraxje kadjy kute Rewi bẻm djir kẻt, ngrekam nỏr rả'ỏkam ne Abraỏo Merkixatekmã ỏ mýjja kwýo ajkij. Nhyh kam Rewidjwý kute kum ỏr pyrâk. Nhyh kam amũ atũmã Rewi wajẻt ne ruw ne kam amũ abatẻnh nhyh kam tẻmdjwý amim mýjja jamýnh ba, ỏ nẻkrẻxkỏt me ỏ mýjja jamýnh ba. Nhyh bep Merkixatek mekbẻ Rewi kajmả'ả nẻkrẻxo mỗ, Abraỏo nhỏ mýjjao mỗ.

¹¹Arỏo kỏpdjỉ'ả mekbẻ Rewibẻ me kadjy Metĩndjwýnh mar djwýnhja ne memã Mỏjdẻ kukrẻdẻ jarẻnh tẻ. Arỏo ne kubẻ me kadjy Metĩndjwýnh mar djwýnh kutewa nhyh kam tẻmdjwý mekbẻ Rewija amũ aben nhujuk'ả kubẻ Metĩndjwýnh

mar djwýnh ne Arão kôpdji'ã memã Môjdjê kukràdjà jarên me kadjy Metíndjwýnh ma. Nhym me te: kôt kute amijo ba mexmã. Nhym kam atemã me kadjy Metíndjwýnh mar djwýnh 'ô ne kato. Atemã. Arão kôt kêtê. Merkixatekkôt ne kato. Nãm ren me mekbê Rewikôt mex nhym ren atemã ny 'ô kator kêt kumrêx ne. Nãm me te: amimex ne te: axwe kêt nhym kam kadjy nyja kato.

¹²Bir be, atemã ne me kadjy Metíndjwýnh mar djwýnh ny 'ô kato nhym kukràdjàdjwý ne kôt atemã. ¹³Gwaj banhô Běnjadjwýr'ã ne idjujarěnhja. Ā mũm me ja kurũm ne kato. Ām atemã. Djãm me ja 'ô kubê me kadjy Metíndjwýnh mar djwýnh got? Ne kute Metíndjwýnh nhô ngônho ki'ã kum mry bôr got. Arkati.

¹⁴Mekbê Djuda kurũm ne kato. Me ja, mekbê Djuda ne me Metíndjwýnhmã àpěnh kêt kumrêx. Nhym me kuní arým kôt omũ. Djã nãm Môjdjê me jamã kum, —Me ga dja ga me abê me kadjy Metíndjwýnh mar djwýnh, ane got? Kati, mekbê Rewimãbit ne arê.

¹⁵Be, arým kute amirít tēja pumũ. Atemã me kadjy Metíndjwýnh mar djwýnh 'ô ne kato. Mekbê Rewi kurũm kator kêtê. Ne kam kute Merkixatek pyræk. ¹⁶Mýjkôt ne kubê me kadjy Metíndjwýnh mar djwýnh? Djã nãm mebêngôkre ta Môjdjê kukràdjákôt kute amũ aben nhjuk'ã abenmã rero těn kam Jeju'ýr bôx ne kum kure nhym kam arým kubê me kadjy Metíndjwýnh mar djwýnh? Djãm mekbê Rewi 'ô? Kati. Bir, mýjkôt? Mýjja tỳxkumrêx kôt. Ta tu tín rã'ã:n kute tín o ino rer kêt kumrêx. Kam ne Metíndjwýnh 'ã me kadjy Metíndjwýnh mar djwýnh nhô běnjadjwýr mē. ¹⁷Metíndjwýnh nhô pi'ók no'ók kam kute,

“Abê me kadjy Metíndjwýnh mar djwýnh rã'ã rã'ã rã'ã ne.

Merkixatek ne akajmã'ã Metíndjwýnh mar djwýnh.

Ga kam Merkixatek nhjuk'ã gadjwý abê me kadjy Metíndjwýnh mar djwýnh”, anhýrja pumũ.

¹⁸Be, Môjdjê kukràdjà tũmkôt mekbê Rewi kute aben nhjuk'ã abenmã Metíndjwýnh mar djwýnh rerja ne arým tũm ne wãnh nō. Arým kajgo mexi. Kute me utār kêt. Kam ne Metíndjwýnh wãnh kudji nhym nō.

¹⁹Môjdjê kukràdjà kute mýjjao mex kêt. Nãm me te: kute kôt amijo ba ne te: kôt kute amijo mexmã. Nhym bep ajbir ne Metíndjwýnh me bawýr mýjja mex jano, Jeju jano. Tãm ne gwaj kamnhíxbê ar baban kôt Metíndjwýnh'ýr bôx. Nhym prĩne raxo, mexo Môjdjê kukràdjà tũm jakre. Kôtbit ne gwaj Metíndjwýnh'ýr bôx.

²⁰⁻²¹Be, gwaj banhô Metíndjwýnh mar djwýnh ny, mextireja pumũ. Kumã ne Metíndjwýnh kaběn pydjín arê. Bep me ja, me kadjy Metíndjwýnh mar djwýnh tũmja ne Metíndjwýnh amim me umjýr kajgon kute memã kaběn pýnh jarěnh kêt. Nhym bep ate ne Jeju. Metíndjwýnh kute amim arkam kum kaběn pydjín arěn kum,

“Ba ibê Běnjadjwýr ne ba arým amã ikaběn pydjín arê. Dja ba atemã ikaběn 'ô jarěnh kêt.

Ga dja ga abê me kadjy Metíndjwýnh mar djwýnh rã'ã: rã'ã ne”, ane.

²²Be, Jeju kukràdjà nyja mexo kute tũm jakrenh mexi. Nhym Metĩndjwỹnh kute kukràdjà nykõt me bamã mỳjja mex jarẽnhja dja mrãmri me bawỳr bõx. Jeju ta dja Metĩndjwỹnh kabẽnkõt mỳjja mex nẽje omũnh 'ãno djan me bamã kungã.

²³Nà, Jeju mexo kute me kadjy Metĩndjwỹnh mar djwỹnh tũm jakrenhja pumũ. Ë, mỳjja 'odjwỹ. Me ja ne me krãptĩ. Nãm me aben nhijuk'ã tyk tẽ. Te kute ãpẽnh 'ãno ãm rã'ãmãn mã aben nhijuk'ã kubẽngẽtte ne tyk tẽ.

²⁴Nhym bep Jeju pydji ne mã: tĩn rã'ã rã'ãn kam mã kubê me kadjy Metĩndjwỹnh mar djwỹnh rã'ã rã'ãn atemã amidjô'ã me'ômã rer kêtumrẽx. ²⁵Ajbit ne tĩn rã'ã rã'ãkam arek Metĩndjwỹnhmã me banẽje kabẽn ne me bajo à'wỳr ar ba 'ãno dja. Nãm me bapytàn ar me bajo ba. Nhỹnh me baja? Bir me baje tu amim Jeju kamnhĩxkõt baje Metĩndjwỹnh'ỳr amijo akẽxja, me batãm ne ar me bapytàn me bajo ba. Gêdjãm ar me bajo ba rã'ã ne. Gêdja me bapytàn rã'ã: ne, rã'ã rã'ã.

²⁶Bir be, me kadjy Metĩndjwỹnh mar djwỹnh nhõ bẽnjadjwỳr rax ã kute anhyr ne gwaj bamãnhkutã. Nãm mexo uma. Kute axwe 'õ mar kêtumrẽx. Punu 'õ kam nõi kêtumrẽx. Nãm mũm mexo amiptà nhym ate me axwe wãnh ar ba nhym Metĩndjwỹnh o rax ne kàjkwamã amiwỳr o wabin kàjkwa nhiby ỳr nhym kam ar ro'ã ar ba.

²⁷Nà, atemã. Kute me kadjy Metĩndjwỹnh mar djwỹnh nhõ bẽnjadjwỳr tũmja pyràk kêt. Djãm kute Metĩndjwỹnh mar djwỹnh nhõ bẽnjadjwỳr tũm kudjwa myt kunikõt ta amijaxwe pãnh Metĩndjwỹnhmã mry par ne bõr ne õr got. Me tãm ne me kumrẽx amijaxwe pãnh kum mry pan kubõn kungãn kam atãri me kuni jaxwe pãnh kum mry pan kubõn kungã. Djã nãm ã Jeju me kudjwa ane got? Arkati, nãm ta Metĩndjwỹnhmã me axwe pãnh tyk pydji. Nãm me axwe pãnh Metĩndjwỹnhmã amikanga pydji nhym tũmrãm dja ajte memã tyk kêt ne.

²⁸Môjdjê kukràdjãkõt ne me axwe prãm nhym me amim me umjuw. Nhym bep tũmrãm, Môjdjê kukràdjã arỳm tũmkam ne Metĩndjwỹnh amim krao katon amim kudja. Nhym kam prĩne Metĩndjwỹnh kabẽnkõt amijo ba. Axwe prãm kêtumrẽx. Dja amũ tũmrãm axwe 'õ kêtumrẽx rã'ã rã'ã, tãm ne amim kudjan kam kum kabẽn pydjin arẽ. Ne kam adjwỹnhdjwỹ aminhidji jarẽn kum,

—Ba ne ba amijo apytàn amim adja. Ga abẽ imar djwỹnh nhõ bẽnjadjwỳr rax, ane. Be, nãm ã anen kam amim Kra dja.

Me kadjy Metĩndjwỹnh mar djwỹnh nhõ bẽnjadjwỳr ny ne Jeju.

8 ¹Bir be, ije ar amã arẽnh ja ma. Arỳm gwaj banhõ Metĩndjwỹnh mar djwỹnh nhõ bẽnjadjwỳr rax ã kute anhyrja pumũ. Nãm kàjkwakam Metĩndjwỹnhbê kumkati krĩ djatikam ubõk'ãnh ikõ'ã nhỹ, kubê bẽnjadjwỳr raxkam ubõk'ãnh nhỹ. ²Kubê Metĩndjwỹnh mar djwỹnh nhõ bẽnjadjwỳr ne kam Metĩndjwỹnh nhũrkwãti kadjwỹnhbê kumoka'êkam ãpẽnh ar ba. Ûrkwãti djwỹnhkam ãpẽnh ar ba. Djãm me ikrao ne me kum kikre got? Kati, Bẽnjadjwỳr djwỹnh ta ne amim kikre nhym kàjkwakam

dja. Ũrkwā djwŷnh ne ja. Nhyṁ kadjwŷnhbê kumoka'êkam Metĩndjwŷnh nhõ mŷjja nêje kubêkàti wajêt. 'Ũr ne arŷm wadjàn kam kam àpênh ar ba.

³Me kadjy Metĩndjwŷnh mar djwŷnh nhõ bēnjadjwŷr rax kunĩ ne Metĩndjwŷnhmā mry bôn kum kungān kôt kum kīnh djā ngā. Kadjy ne amim me umjuw. Nhyṁ gwaj banhō Metĩndjwŷnh mar djwŷnhdjwŷ mŷj ne kum kungā? Kati, ām ta ne kum amingā.


⁴Nām ren jakam, pyka jakam ar ban ren kubê me kadjy Metĩndjwŷnh mar djwŷnh kêt kumrēx ne. Ga me kadjy Metĩndjwŷnh mar djwŷnh kumex ne kute Môjdjê kukràdjākôt Metĩndjwŷnhmā kīnh djā nhōr rā'āja pumũ. Kam ne ren jakam ar ban ren arŷm kubê me kadjy Metĩndjwŷnh mar djwŷnh kêt.

⁵Pyka jakam Metĩndjwŷnh nhõ kikreja ne kàjkwakam ũrkwāti djwŷnhja'ā amijakre nhyṁ me kam kam àpênh ar ba. Ô'ā ne pykabê õ kikreja. Nām Môjdjê kute kike nhipêxmā nhyṁ kam Metĩndjwŷnh prīne kôt kum 'ā karō, kute kum 'ā karō nhyṁ kute kôt kum ipêxmā. Kute kàjkwakam ũrkwāti ja'ā akren kute kôt kum ipêxmā ne kum 'ā karōn kum, “Gora prīne inhŭrkwāti djwŷnh'ā akren imā ipêx, ane.

Krānhre'ā ije amā akrejakôt dja ga ipêx”, ane.

Be, mŷjja kàjbê mex ne ja. Kàjkwakam ũrkwā djwŷnh ne mexkumrēx, nhyṁ bep ja, pykabê ja ne ô'ā. Ô'ā ne kam kàjbê mex.

Nhyṁ bep ũrkwā djwŷnh ne mrāmri wŷnh, mextire. ⁶Nhyṁ àpēnhdjwŷ mextire. Metĩndjwŷnh ne kum àpēnh ny jarē nhyṁ àpēnhja prīne mexo kute me kadjy Metĩndjwŷnh mar djwŷnh tũm djāpēnh tũm jakrenh. Nhyṁ kukràdjā nydjwŷ prīne mexo kute tũm jakrenh. O ne Jeju Metĩndjwŷnh'ŷr mebēngōkreo bōx. Nhyṁ Metĩndjwŷnh me bamā kabēn



(Mekbê idjaer 8.5)

pydjin arêh kam me bamã mỳjja mex jarê. Mỳjja mexja ne mexo tũmja jakrenh mex ne. Kôt kukràdjã nydjwỳ mexo tũmja jakrenh mex ne.

⁷Nãm ren Mòjdjê kukràdjã ajmã kute kêt nhym ren ajte kukràdjã ny kator kêtumrêx ne. Nãm ren kutewaja mex nhym ren ijukri ny 'ô kator kêtumrêx ne.

⁸Nhym bep kati, nãm kukràdjã tũmja kute me utàr kêt nhym kam pãnh Metĩndjwỳnh kukràdjã ny kute me utàrja pãnh o kato. Nãm mekam kĩnh kêt ne memã kum,

“Adjỹm, amũ akati 'ôkam dja ba mekbê idjaer kunĩmã atemã ikabên ny 'ô jarêh mãmđji, atemã kukràdjã ny 'ô.

Nà, Djuda aben nhjuk'ã tãmdjwỳjamã gędja ba atemã kukràdjã ny 'ô jarê. Ba ibê Bẽnjadjwỳr ne ba me amã ikabên ne.

⁹Ate ne nyja. Ate ne tũm, ije me akukãmãremã arênhja, tãm ne tũm. Amrêbê ne ba me akukãmãre pa 'ãbyn pykabê Edjitu kurũm meo ikaton kam ar meo iban memã ikukràdjã ja jarê.

Nhym be nãm me ikabên mar prãm kêt ne arĩk ar ba. Ba kam amipãnh tu me kanga.

Ibê Bẽnjadjwỳr ne ba me amã ikabên ne.

¹⁰Bep jakam dja ba mekbê idjaermã ikukràdjã ny jarê. Amũ akati 'ôkam dja ba memã ny 'ô jarê.

Ba ibê Bẽnjadjwỳr ne ba me amã ikabên ne.

Me ôkre kadjwỳnhbê dja ba ikukràdjã jao adjàn me ajamak krekre'adjwỳ pi'ôk no'ôk ne.

Ne kam meo inhô me jakumrêx nhym me amipãnh Metĩndjwỳnhho ipytàn kam amim ijo Metĩndjwỳnhkumrêx.

¹¹Djãm me ôbikwamê kute abenmã kum, nàr me kamy kute abenmã kum, ‘On amim Bẽnjadjwỳr djwỳnh ma’, anhỹrmã.


Kati, me kunĩ dja arỹm amim ima. Me kàtammê me rũnhmê me kunĩ dja me amim ima.

¹²Ba kam me kute ikam amikràjakam idjukaprĩ ne kam me ikam axweja tu o akno”, ane.

Nãm ã Metĩndjwỳnh kukràdjã ny'ã ujarêh ane. ¹³Kute kukràdjã ny jarêh kam arỹm ôbê jao tũm ne. Be, ga mỳjja arỹm tũm tẽm ne arỹm biknor 'ỳrja pumũ.

**Kute pykakam Metĩndjwỳnh
nhô kikreti jarêh.**

9 ¹Amrêbê ne Metĩndjwỳnh prĩne kukràdjã tũmja, kukràdjã kutewaja'ã



(Mekbê idjaer 9:2)



(Mekbê idjaer 9.4)

Nhym kam nêje kubêkà wajêt. ⁴Kam ne kên karÿro kikre kudjÿ djà bôr djâmê kên karÿro pïo rara krākà djjyamê ku'ê. Nhym kên karÿrreo pïo rara krākà djj kam ne ngôn h dja. Kên karÿro ngôn h kam djwÿ nhidjibê “Mÿj ne ja” nÿt ne dja. Nhym kam kam Arão nhô kô me aêrbê ingrôt ne ôja nô. Nhym kam kamdjwÿ Metîndjwÿnh kute amikabên'ã kên no'ôkja amê nô.

⁵Nhym kên karÿro pïo rara krākà djyja'ã Metîndjwÿnh kadjy mrân h djwÿnh amê ar karô kàjbê prêkja aben kutã dja. Metîndjwÿnhbê kumkatiti:, Metîndjwÿnh pymati, Metîndjwÿnh mexo tuknï kadjy mrân h djwÿnh karô nhipêx ja dja. Pïo rara 'ã ijê djà'ã dja. 'Ã ijê djà ja ne me kadjy Metîndjwÿnh mar djwÿnh nhô bënjadjwÿr mry kamrôo kaprêprêk nhym Metîndjwÿnh apÿnh me axwe djàri tu o akno. Aj, djâm on ije ar amã prîne ja jarên h mã got. Ba ar amã mÿjja 'ôdjwÿ jarê.



(Mekbê idjaer 9.5)

memã karô, kôt me kute ar amijo ba ne kum kabên ne kum àpên h kadjy. Nãm me pykabê kum kikren kam kam kum kabêno ku'ê.

²Nãm me kubêkãmê mrykãmê pïponho kikren ajkwa krekre'ã kubêkà nhô. Kikrebê kumkati ne ja. Kam ne ngôn h pôktimê pïponh ku'ê. Nhym djwÿ me kute Metîndjwÿnhmã ôr ne pïpon h kam adjwÿrjadjwÿ ikwã. Apÿnh mÿjja ku'ê djàri ne ja.

³Kadjwÿnhbê ne kumoka'ê.

⁶Be, nãm ã Metîndjwÿnh nhô kikrekam apÿnh mÿjja ku'ê djàri ku'ê ane. Nhym me kadjy Metîndjwÿnh mar djwÿnh kâtàm myt kunîkôt kikrebê kumkatikam wangij ne kam kam àpên h ar ba.

⁷Nhym bep me kadjy Metîndjwÿnh mar djwÿnh nhô bënjadjwÿr rax pydji ne kadjwÿnhbê kumoka'êjamã wangij. Djâm myt kunîkôt? Arkati, kum ngorekambit. 'ÿr ngjên h nhô

akati apôxkambit ne 'ÿr ngjênh pÿnh ne. Nhym ajte kum ngore nhym ajte 'ÿr wadjà. Akati pÿnhkambit. Djã nãm ÿkam 'ÿr wangij? Kati, mry kamrô ne 'ÿr o wangijn Metîndjwÿnhmã kungã. Ta amijaxwemê me kâtãmja jaxwe pãnh ne kum kungã. Me kute mar kêt ne kute Metîndjwÿnhkam amikràò ba pãnh ne me ô'ã o mrãn o wangijn kum kungã.

⁸Jakôt ne Metîndjwÿnh Karô memã o amirît, me kute me kâtãm Metîndjwÿnh'ÿr ngjênh kêt kôt mar kadjy. Metîndjwÿnh nhô kikrebê kumkati âm rã'ã nhym me kute kukràdjà tùmjaò ba rã'ãri ne me kâtãmja Metîndjwÿnh'ÿr ngjênh kêtumrêx, kumoka'êjamã ngjênh kêtumrêx. Me kâtãmja kraxje 'ÿr ngjênh kêt.

⁹Be, pykabê Metîndjwÿnh nhô kikremê kôt kukràdjà tùmja ne Kritu kukràdjà djwÿnh'ã amijakre nhym me Kritu kajmã'ã ar o ba. Kukràdjà tùmja ne me ï krākãbito mex. Nãm me kukràdjà tùm kôt te Metîndjwÿnhmã mry bôn kum kungãn te kum kÿnh djà ngãn mã amikam kute axwe mar rã'ã. Me kute kum mry nhôr djwÿnhja te kum mry bôn kum kungãn kadjwÿnhbê mex kêt rã'ã ne. ¹⁰Kukràdjà tùm kôt ne me me ô kwÿ krên djãmê mÿjjao kôm djã'ã memã karôn mekbê uma. Ne kam ajte me kute apÿnh amiku'ôn'h djari memã 'ã karô, me kute kôt amijo bamã. Apÿnh kukràdjà ja ne me ï krākãbito mex. Metîndjwÿnh kute mÿjja kunio ny kajmã'ã ne memã kukràdjà tùmja'ã karô nhym me ar o ba.

Kritu kamrô'ã ujarênh.

Xim k 2.5; Idja 8.6, 12.24

¹¹Nhym arÿm Kritu bôx ne arÿm kukràdjà ny, kukràdjà mexo kato. Ne kute kukràdjà nyo kator kadjy kubê me kadjy Metîndjwÿnh mar djwÿnh nhô bënjadjwÿr rax ne arÿm Metîndjwÿnh nhürkwã djwÿnhmã wadjà. Metîndjwÿnh nhürkwãti prïne kute raxo, mexo pykabê ja jakrenh mexjamã wadjà. Mebêngôkre kute ipêx kêt. Me banhô pykabê mÿjja, pĩ, bô, bànhôr jao kikre nhipêx kêt.

¹²Be, tãm, Metîndjwÿnh nhürkwã djwÿnhbê kumkatimã wadjàn kam amũ kadjwÿnhbê kumoka'ê'ÿr àr pydji. Djã nãm 'ÿr wangij ne akubyn apôx ne 'ÿr ngjênh krãptĩ got? Kati, nãm 'ÿr àr pydji. Djãm mokaàk kamrô nàr mryti jabatàn'h nyre kamrô ne o wadjà, kute Metîndjwÿnhmã òrmã? Arkati, nãm ta amikamrôo wadjà. Ne o me bapytã. Me bapytàrkumrêx. Gu me batĩn rã'ã rã'ã ne baje o ino rer kêt kadjy.

¹³Amrêbê kukràdjà tùm kôt ne me mry kamrôo me kamĩ, me akubyn mex kadjy. Nãm me Metîndjwÿnhkam amikràn kam punu. Nhym kam Metîndjwÿnh mar djwÿnh mryti djũmre kamrômê mokaàk kamrôo me kamĩ. Ne mryti jabatàn'h nyre, kañhre bĩn kum adjàn kam prã byn o me punu kaprêprêk. Nhym me kam akubyn mex.

¹⁴Be, ga mry kamrô kute kàjbê meo mexja pumũ. Bep Kritu kamrô ne mrãmri meo mexkumrêx. Metîndjwÿnh Karô tĩn o ino rer kêtja tãm ne Krituo ban o tÿx nhym kam kôt Metîndjwÿnhmã amingã. Djãm punu ne me kubĩ? Kati, nãm mexo mextire, ajmã kute kêt ne ta Metîndjwÿnhmã

amingã̃n kam kamrô ajkapĩ. Ta kamrô ne prĩne me bajo mex. Me batyk ne baje Metĩndjwỳnhmã bakre rax ne nĩjar baba kady ne gu me bamã bajaxwe kĩnh ne o baba. Nhym kam ta kamrôo prĩne me bakadjwỳnhbê me bajo mex gu me kam arỳm bakadjwỳnhbê bapijãm kêt ne amikam bajaxwe'ô mar kêt ne Metĩndjwỳnhmã badjãpênh ar baba, Metĩndjwỳnh tĩjamã apê.

¹⁵Kadjy, Kritu kamrô prĩne kute me bajo mex gu me Metĩndjwỳnhmã badjãpênh kady ne Kritu kukràdjã nyo kato. Metĩndjwỳnh kute amiwỳr me bajwỳr ne kute me bamã kabên pydjĩn arênh ne kute me bamã mỳjja mex jarênh gu me 'ỳr babôxmã. Nhym me banhô mỳjja mexja dja rã'ã rã'ãn o ino rer kêtukumrêx. Mrãmri dja Kritu ã memã o ane. Kadjy ne arỳm me axwe pãnh ty. Me kute kukràdjã tũmja ar o bari ne me Metĩndjwỳnhkam axwe nhym kam arỳm Jeju amityko o pãnh ne.

¹⁶⁻¹⁷Bir be, nãm tykkôtbĩt o pãnh. Nhym kam ajte mỳjja tykkôtbĩt ne mỳjja amirĩt. Ga me ôbikwa tyk kutã kute abenmã ô mỳjja'ã karôja pumũ. Ôbikwaja tyk kutã ôbikwamã ô mỳjja'ã karô ne,

—Godja ba ty ga kam inhô mỳjja jao mō.

Ne kam kum ô mỳjja nhidji jarên kum,

—Tãm dja ga o tẽ, ane.

Gêdja kute kum 'ã karôja ty nhym kam ôbikwaja amũ ajte kudjwa ô'ã ar o ba. Me tykkambĩt ne me ajmãn aben nhô mỳjja jamỳn mã amũ abendjô'ã o ba. Me tĩn rã'ãkam ne me kute aben nhô mỳjja jamỳnh kêt. Me tykkambĩt ne me kute me ô mỳjja kajgo jamỳnh. Bir be, me tykkôtbĩt ne mỳjja amirĩt. Nhym kukràdjã tũmjadjwỳ ajte tãm ne.

¹⁸Nãm me kute kukràdjã tũm kutewaja o bao kurê'ukmã ne Môjdjê mry kamrôo me kamĩ. Mỳjja tyk ne kamrô bikapĩnkôtbĩt ne mỳjjao mex djã.

¹⁹Nãm Môjdjê memã Metĩndjwỳnh kabên kukràdjã kunĩ'ã ujarênh kumrêx arê. Metĩndjwỳnh kute mekbê mỳjja pymaja memã arênh o djan memã kunĩ jarênh pan kam mry kamrô by, mryti jabatàn nhremê mokaak kamrô run kam iby ngô run kam pi'ô nhikwỳr ne kadjãt kamrêk jakritare jao krax 'ãpren kam pi'ôja mry kamrômã adjãn kam o me kaprêprêk. Metĩndjwỳnh kabên kukràdjã'ã pi'ôk no'ôkja kumrêx ne kamĩn kam mebêngôkrejadjwỳ kamĩ. ²⁰Me kamĩn kam mekmã kum,

“Be, Metĩndjwỳnh kute me amã amikukràdjã jarênh mãmdji ga me aje kôt amijo aba kady kamrô ne ja. Gora me 'ãno dja”, ane.

²¹Ne kam ajte Metĩndjwỳnh nhô kikre kamĩ. Nãm kapôtã kukràdjãja kumrêx kamĩn kam kikre kadjwỳnhbêja'ỳr o wadjãn kam adjwỳnhdjwỳ o kamĩ, kukràdjãja kunĩ kamĩ. ²²Bir be, Môjdjê kukràdjãkôt ne me mry kamrôobit mỳjjao mexo ba. Kamrô kapĩnkôtbĩt ne apỳnh me axwe djãri Metĩndjwỳnh tu me axweo aknon mar kêtukumrêx ne.

²³Bir be, pykabê Metĩndjwỳnh nhô kikremê ô kikrekam kukràdjãja ne kàjkwakam mỳjja djwỳnh'ã amijakre. Kam ne Môjdjê mry kamrôobit ã mỳjjao mexo ane. Nhym bep kàjkwakam mỳjja djwỳnh kady ne me mỳjja mexbit kum kubĩn kungã. Kàjkwakam mỳjja djwỳnhja kady ne me mỳjja

mexbit kum kubĩn kungã. Mỳjja mexo kute pykabê mỳjja ja jakrenh. Mỳj ne mex nhym me Metĩndjwỳnhmã kubĩn kungã? Je kum Jeju. Jejubit ne mexkumrêx ne kam Metĩndjwỳnhmã amingã nhym me kubĩ.

²⁴Djã nãm me Metĩndjwỳnhmã kikre nhym kam Kritu kadjwỳnhbê kumoka'êja'ỹr wadjà? Kàjkwakam ò kikre djwỳnhja'ã kute amijakre djãm kumã ne wadjà? Kati, nãm tu kàjkwamã wadjà. Kum wadjàn arỳm Metĩndjwỳnh kabem djan kum me bajarênhô djan me banêje kukràô dja.

²⁵Djã nãm Metĩndjwỳnhmã aminhôr krãptĩ? Kute pykabê Metĩndjwỳnh mar djwỳnh nhô bẽnjadjwỳr rax kikremã ngjêx krãptĩja pyràk? Kum ngore kunĩkôt kute mry kamrôbito mrãnh ne Metĩndjwỳnh nhô kikre kadjwỳnhbê kumoka'êmã o ngjêxja pyràk? ²⁶Arkati, nãm ren kum aminhôr krãptĩn ren arỳm tokry krãptĩ. Ren pyka nhipêx totokbê ren arỳm apỳnh tokry krãptĩ. Bep kati, arỳm pyka kute o ino rerkam arỳm kator ne kute mekbê axweo apêxmã kute Metĩndjwỳnhmã aminhôr mãmđji.

²⁷Ga Metĩndjwỳnh kute me kunĩ'ã amim karôja pumũ. Me kunĩ dja me tyk pydji nhym ijukri dja Metĩndjwỳnh memã axwe pãnh jarê.

²⁸Bir be, nãm ã Kritudjwỳ tyk pydjio ane. Kute Metĩndjwỳnhmã aminhôr nhym me kute bĩn mãmđji. Nãm amijã me krãptĩ jaxwe mẽn kam me pãnh Metĩndjwỳnhmã amingã nhym me kubĩ. Dja ajte me bawỳr kato. Djãm kute axweo pãnhmã? Kati, kute ò me ja pytâr ne kute meo mormã. Pykabê me kute abej ajkam amakja pytâr ne ar meo bamã dja ajte kato.

Kritu pĩte'ykam tyk pydji.

10 ¹Bir be, Mõjdjê kukràdjà ne mỳjja mextireja kukãm bõx. Kubê wỳnh kêt. Mỳjja mextire bõx kêtĩ ne Metĩndjwỳnh Mõjdjê kukràdjajao kato. Nãm mỳjja mex djwỳnh'ã amijakre kajgo. Kam kute meo mex kêt. Metĩndjwỳnh kute me axweo bingrànħ kadjy ne me kum mry pan kubôn kungã. O anhyro ba tãmtã: ĩ arek amũ namê amex kunĩkôt o anhyro tẽ. Nãm me te mry pan kamrô kapĩn te kute o amikam axweo apêx ne mexmã te o amijo ane. Me kute Metĩndjwỳnh'ỹr bikamênh prãmja ne me te amijaxwe kêtĩmã amijo ane. ²Nãm ren me kute Metĩndjwỳnhkôt amijo ba prãmja mry kamrôo ren amikam axweo apêx ne ren mrãmri amikam axwe'õ mar kêtĩkumrêx ne ren tu mry par krãta.

³⁻⁴Nhym bep kati, nãm me te o amijaxweo ane. Mryti djũmre kamrômê mokaak kamrôo mrãmri me kute amijaxweo apêx kêt. Nãm me te o amijo anen mã axwe. Mry kamrô kute memã axweo apêx kêt. Nãm tu amex kunĩkôt memã axweo amirĩto tẽ.

⁵⁻⁶Kam ne Kritu pykamã rwỳk kutã Bãmmã kum,

“Nã gãm arỳm amã mry kamrô kapĩnmẽ me kute amã djwỳ nhôrja kĩnh kêt. Nhym me kute amijaxweo apêx kadjy nàràm kute mry par ne rã'ã ngônho kikam rênħ ne kute kum angjênħ ne kute amã ôrja tãm ne ga arỳm abê kĩnh no kati.

Ne kam aje ijo inhĩmã ijã amim karõ.

⁷ Ba kam amã,

‘Metĩndjwýnh, ota ba dja. Aje amim ijã karökôt ne ba jãnh dja.

Amrêbê anhõ pi'ók no'ókka m aje ijarênhkôt ne ba jãnh dja', ane.”

Nãm ã Kritu Bãmmã ane. ⁸Nãm kum,

“Mry kamrô kapĩnmẽ me kute amã djwý nhõrjamẽ me kute amim axweo apêx kadjy nàrà mry par ne kute ngõnho kikam rã'ã rênh ne kute kum angjênh ne kute amã ôrja tãm ne ga amã kĩnh kêt ne abê kĩnh no kati”, ane.

Djã nãm me kupa'ã ar o ba? Kati, mrãmri ne Môjdjê memã kôt 'ã karõ nhym me kute kôt ar o ban kute Metĩndjwýnhmã mry par ne kute ôro ba. Nhym Kritu Bãmmã kum,

“Ga abê kĩnh no kati”, ane.

⁹Nãm kum kabên ja kumrêx jarên kam atãri kum,

“Metĩndjwýnh, ota ba dja. Aje amim ijã karökôt ne ba jãnh dja”, ane.

Bir be, nãm me kute mry par ne kum ôrja arým o apêx. Kute pãnh nyjao katormã ne arým tũmjao apêx. ¹⁰Metĩndjwýnh kute 'ã amim karökôt ne Jeju Kritu tẽn ruwn ta Metĩndjwýnhmã amidjwýnh ngã nhym me kubĩ. Nãm kute kum aminhõrkam me bĩn mãm dji. O ne prĩne me bajo mex, prĩne me bajo mexo mexkumrêx ne.

¹¹Me ĩ pýnhkôt me kadjy Metĩndjwýnh mar djwýnh aben nhijuk'ã myt kunĩkôt ngõnho ki kabem ku'ên mry kupê. Nãm me kute Metĩndjwýnhmã mry par ne bõr ne kum ôrmã bõro ku'ê. Nhym akati nhym tãm ne. Nhym akati nhym ajte tãm ne. Nãm memã axweo apêx kêt kumrêx ne.

¹²Nhym bep ate ne Kritu Metĩndjwýnhmã mýjja pydji ngã. Nãm kum amingã nhym me bĩn pydji. Nãm amijã me axwe mẽ nhym me kam bĩn pydji. Nãm me kubĩ nhym kam tu amijã me axweo apêxkumrêx. Jakôt ne Metĩndjwýnh djubók'ãnh nhỹ, kubê bẽnjadjwýr raxkam ubók'ãnh nhỹ.

¹³Ne kam arek kam amako nhỹ. Metĩndjwýnh kute kurê djwýnho bikênh mex nhym me kam umaje kuka kôn timereto ku'ên kam tu mýrbê rôrôk nhym kute kwý o pardjan kwý nhimex, ja ne kam amako nhỹ.

¹⁴Bir be, kute Metĩndjwýnhmã aminhõr pydjijakôt arým mrãmri tu me'ã mex mẽnhkumrêx nhym me mrãmri mex rã'ã rã'ã rã'ã. Kute me bajo mex ne kute me bajaxwe kêtõ tẽmja, me bajã ne tu mex mẽnhkumrêx.

¹⁵⁻¹⁶Nhym Metĩndjwýnh Karôdjwý kôt arê,

“Bep jakam dja ba memã ikukràdjã ny jarê. Amũ akati 'ókam dja ba memã ny'ô jarênh mãm dji.

Ba ibê Bẽnjadjwýr ne ba me amã ikabên ne.

Me ôkre kadjwýnhbê dja ba ikukràdjã adjã kunhõ. Ne me amak krekrekamdjwý kunhõ”, ane.

Nãm kabên ja kumrêx jarên kam atãri memã kum,

¹⁷“Apýnh me ikam ajaxwe djãri, me aje ikam amikrà ar o abajadjwý gêdja ba tu mar krãtan o akno.”

¹⁸Bir be, mrāmri ne Metĩndjwỳnh arỳm o akno. Kam ne me kute amijaxwe pānh Metĩndjwỳnhmā mry par ne kum ōrja arỳm apēx. Arỳm kêt. Arỳm Metĩndjwỳnh kute kam me axweja kunĩo biknorjakam ajte we amijaxwe pānh mry par ne ar Metĩndjwỳnhmā ōro ba. Kati, arỳm kêt.

Me kute Kritu mar'ā ukanga kêt mā.

Ep 3.11

¹⁹Ē, akmere ar, àpnhĩre ar, mrāmri dja gwaj tu bapijām kêt ne Metĩndjwỳnh nhō kikre kadjwỳnhbê kumoka'ēmā wangij ne Metĩndjwỳnh 'ỳr bōx ne tu kum amijarē. Mỳjkôt dja gwaj bapijām kêt ne tu 'ỳr wangij? Jejukôt. Gwaj bakadjy tyk ne kamrō bikapĩnkôt dja gwaj bapijām kêt ne Metĩndjwỳnh'ỳr bōx ne tu kum amijarē ne kum bakabēn.

²⁰Pykabê Metĩndjwỳnh nhō kikre kadjwỳnhbê kumoka'ê nêje, Metĩndjwỳnh krĩ djà nêje ne kubêkàti wajêt nhym me 'ỳr ngjēnh kêtumrēx. Nhym bep ajbir Jeju ne me bakadjy Metĩndjwỳnh'ā kutan 'ỳr pry ny dji. Pry kubê Jeju. Kute Metĩndjwỳnhmā ta aminhōr nhym me kute bĩn nhym ajte tĩnkôt ne gwaj tu Metĩndjwỳnh'ỳr mrān bōx ne wangij ne tu kum bakabēn.

²¹Be, gwaj banhō Metĩndjwỳnh mar djwỳnh nhō bēnjadjwỳr raxkumrēx. Nām prĩne Metĩndjwỳnh nhō me jao ban meo djuw mex ar o ba.

²²Gora gwaj kam tu Metĩndjwỳnh'ỳr mrān bōx ne tu kum bakabēn, on batĩnri 'ỳr mrān bōx ne kum bakabēn. Amrēbê ne Mōjdjê Metĩndjwỳnh kukrādjàkôt kute meo mex kadjy mry kamrōo me kamĩ nhym me kam akubyn mex ne. Ne kam ajte me kute amijo mex kadjy ngō mexkambit djuwn o jām amijā ngrā rē. Gwaj baje tu amim Jeju kamnhĩxkam dja gwaj Metĩndjwỳnh kadjy bamex. Jeju ne gwaj bajo mex. Ā gwaj bamex tanhỹrkam dja gwaj Metĩndjwỳnh'ỳr mrān bōx ne tu kum bakabēn, on batĩnri 'ỳr mrān bōx ne kum bakabēn. Kwārĩk wānh gar ajō anhōkre kadjwỳnhbê amim,

—Djām Metĩndjwỳnh imā mex? anhỹr kêt. Dja gwaj tu amim kamnhĩxkumrēx ne katāt bakabēnkam tu 'ỳr mrān kum bakabēn. Pykabê gwaj ar babari dja gwaj ā o ane.

²³Gora gwaj mā 'āno dja. Metĩndjwỳnh kute gwaj bamā mỳjja mex jarēnh gwaj baje tu amiwỳr kamnhĩxbê ar babaja ne gwaj arỳm memā arē nhym me kuma. Gwaj gop mā 'āno djan gop arek amiwỳr kamnhĩxbê ar baba. Kwārĩk wānh gwaj 'ā badjukanga kêt. Metĩndjwỳnh ne arỳm gwaj bamā kabēn pydjĩn arē. Mrāmri ne kabēnkumrēx. 'Ēxnhĩ kêtumrēx ne kute gwaj bakanga kêtumrēx. Kam dja gwaj amiwỳr kamnhĩx tỳxbê ar baba.

²⁴Gora gwaj aben ma ne amidjwỳnhbit mar kêt. Dja gwaj bamā aben jabēmābit abenmā karō ne ajte bamā mỳjja mexbit kĩnh ne baje o baba'ā abenmā karō.

²⁵Gora gwaj abeno babikprōnh rā'ā. Nhym bep me kwỳ ne me arỳm kum abeno bikprōnh kanga. Nhym bep kati, gwaj ba dja gwaj o anhỹr kêtumrēx. Gwaj ba dja gwaj abenmā tỳx jangij, mā Jejukôt gwaj babikamēnh rā'ā kadjy. Metĩndjwỳnh nhō akati arỳm o rām ne ja. Kam gēdja gwaj mā abenmā tỳx jangjēnh ar o baba.

²⁶Me kute me bamã Metĩndjwỳnh kabẽn 'êxnhĩ kêt jarẽnhja ne gu me baje amim marmãn ate mã bamã bajaxwebit kĩnh ne, nhỹnh ne mỳjja 'õ ajte me bajaxwe pãnh tykmã got gu me bamã bajaxwebit kĩnh ne. Arkati, Jeju pydji ne me bajaxwe pãnh ty. Atemã mỳjja 'õ kêtukumrẽx. Mỳjja 'õ kute me bajaxwe pãnh tyk ne kute me bamã me bajaxweo bingrãnh kêt. ²⁷Nhym bep ãm mỳjja ti, mỳjja punuti, mỳjja pymati: wã pydji ne me jamã nõ. Me kum Metĩndjwỳnh kurẽjamã ne nõ. Memã gẽdja axwe pãnh jarẽ ne kam kuwy pòktijamã me kurẽ. Kumã dja me kurẽ nhym me prĩne xêr. Me kajmã'ã ne nõ. Kumã dja me kurẽ. Djãm uma ngri? Gora ar amikam ajkam ama.

²⁸Ê, amrêbê me'õ kute Mõjdjê kukrãdjãkõt amijo ba kêtja nhym me'õ axwekõt omũ. Birãm me'õ amãnhkrut nãr kon amãnhkrut ne ikjêkêt me'õ jaxwekõt arỳm noo omũn arẽ nhym me arỳm pãnh kubĩ, kum kaprĩ kêt ne tu kubĩ, axwe pãnh.

²⁹Bir be, kam dja me'õ kute Metĩndjwỳnh kra japrỹkam mrãmri arỳm o bikẽnh rax ne. Me kute Mõjdjê kukrãdjão bikẽnhkam ne me kute tu bĩn kajgomã. Bep me kute Metĩndjwỳnh krao bikẽnhkam dja pãnh rax. Pãnh raxo prĩne kute Mõjdjê kukrãdjãkõt me kute me bĩn kajgoja jakrenh mex ne.

Nãm me Metĩndjwỳnh kra japrỹ ne kam ajte Metĩndjwỳnh kukrãdjã ny kadjy kamrõjao mỳjja punu, Metĩndjwỳnh kute memã kukrãdjã ny jarẽnh mãmđji kadjy kamrõ jao mỳjja punu. Kra ne tyn amikamrõ kapĩ gu me kam arỳm Metĩndjwỳnh kukrãdjã nykõt amijo baba. Kamrõ jao ne me mỳjja punu, o mỳjja kakrit ne kubê kanga. Jeju kute kamrõ kapĩnkõt ne Metĩndjwỳnh memã me axweo ajngrã ne meo mex nhym be nãm me tu kamrõ jao mỳjja kakrit ne kanga.

Ne kam ajte Metĩndjwỳnh Karõ japrỹn kum ngryk jadjã. Metĩndjwỳnh Karõ me bakam ukaprija, gu me baje te kam amikrã ar o baba nhym mã me bakam ukapri, ja tãm ne me aprỹ. Djãm ja pãnh kêt got? Mrãmri gẽdja prĩne Metĩndjwỳnh me jao bikẽnh mex ne. ³⁰Nhỹnh me'õja kute memã kum,

“Bajbit dja ba memã amijo pãnh ne. Ba dja ba me axwe pãnh meo ajkê”, anhỹrja ne gwaj arỳm mar mexkumrẽx. Nhym ta ajte memã kum,

“Bẽnjadjwỳr djwỳnh ta dja õ me jamã pãnh jarẽ”, ane.

³¹Metĩndjwỳnh tĩn ne ar ba tãm dja pao meo bikẽnh mex ne. Kute pao meo pãnh ja tãm ne uma:kumrẽx. Djãm mỳjja wã pyma ngri got.

³²Ê, amrêbê Metĩndjwỳnh kute ar ano bõnh totokbê ja gora ar ama. Nãm me te ar ajo bikẽnh ba gar mã 'ã angrã tỳx ne, ne te atokryn mã 'ã angrã tỳx ne. ³³Nãm me me ipòkri ar ajaprỹn ar akamjêro ba. Nãm ã me ar akwỳo ane gar anhitepatato ar kuri aku'ên ar omũnho aku'ên kam ar ô'ã akã djãn akaprĩn ar omũnho aku'ê.

³⁴Nhym me ajte ar akwỳbê ijê gar ar ô'ã arerek ne akaprĩn ar omũnho aku'ê. Nhym me te ar anhõ nêkrẽxo prõt gar kam mã akĩnh. Mrãmri arỳm kàjkwakam anhõ mỳjja mextirekõt ajamak bẽn kam tu ate akrã. Kàjkwakam anhõ mỳjja me:xkumrẽx. Mexo kute pykabê ja jakrenh mexi. Tãm gẽdja rã'ã rã'ã rã'ã. Nhym me te pykabê mỳjja jao ar ajo ajkê, gar kam kãmã mỳjja ja man mã akĩnh.

³⁵Bir be, gora ar amã me uma kêt ne atỳx ne kõt amijo aba rã'ã. Kwãrĩk wãnh gar amã kanga kêt. Mrãmri dja Metĩndjwỳnh pãnh ar amã mỳjja

mextire ngã. ³⁶Dja gar arek akrànã amijo aba 'ãno dja. Metĩndjwỳnh kute ar ajã amim karõ ne kute ar amã mỳjja jarẽnhja kôt dja gar amijo mõ. Dja gar 'ãno djan akrànã o amõr rã'ãn arỳm kôt 'ỳr bõx. Kute me bamã kabẽn pydjĩ jarẽnh ne kute me bamã mỳjja mex jarẽnhja 'ỳr bõx. 'Ỳr bõx ne amim aby. ³⁷Metĩndjwỳnh kabẽnkam ne krabê Jeju akubyn me bawỳr bõx'ã,

“Adjỳm ngrire, dja ĩ me awỳr tẽn bõx. Amrêbê ne tẽmmã krà ne kam arỳm amrê tẽn 'ỳr. Dja tebê amikrà kêt ne.

³⁸Me kute amikajmã'ã imar ba arỳm ije memã axwe kêt jarẽnh nhym me katat mrãnhja dja me mã imar rã'ãn ar ikôt ba.

Gêdja me'õ me umaje akubyn ibê akêx ba kam arỳm ibê kĩnh no kati”, ane. Nãm ã Metĩndjwỳnh ane. ³⁹Nhym bep gwaj ba ne gwaj baje ã anhỳr kêtumrêx. Djãm gwaj bamã me uman baje kubê amijo akêx ne kam tu babiknorkumrêxmã? Arkati, gwaj ba ne gwaj tu amikajmã'ã markumrêx nhym arỳm Metĩndjwỳnh gwaj bapytàn ar gwaj bajo ba.

Me tũmre kute amikajmãtã Metĩndjwỳnh mar.

11 ¹Ije, mỳjbê ne me kute amikajmã'ã mỳjja mar? Mã ne kute?

Bir, me baje amikajmã'ã mỳjja markam ne gu me tu amim kamnhĩxkumrêx ne amiwỳr kam amakbê ar baba. Ne tu amim markumrêx ne banhõkre kadjwỳnhbê amim,

—Nã, mrãmri dja iwỳr bõxkumrêx, ane. Ne kam ajte me baje banoo mỳjja pumũnh kêtka tu amim markumrêx ne banhõkre kadjwỳnhbê amim,

—Nã, mrãmri dja ba ĩ amũ akati 'õkam omũ, ane. Nã gu me ã amikadjwỳnhbê amikajmã'ã mỳjja maro ane. ²Nãm ã amrêbê me bakukãmãre tu amikajmã'ã Metĩndjwỳnh maro ane nhym arỳm mekam kĩnh ne.

³Nã gu me badjwỳ ã amikajmã'ã Metĩndjwỳnh kute pyka nhipêxkôt maro ane. Nãm kabẽno pyka nhipêx nhym kato. Me kute noo mỳjja pumũnh kêtõ ne pyka nhipêx. Nhym arỳm apõx ne amirĩt gu me arỳm kôt omũ. Ne kam amikajmã'ã kute pyka nhipêxkôt kuma, amikajmãtã arẽnh ma.

⁴Nãm ã Abeu amikajmã'ã Metĩndjwỳnh maro anen kam õ krit bĩn kugan kum kungã. Nãm kum mỳjja mex ngã. Mexo kute kamybê Kaĩ nhõ mỳjja ja jakrenh. Nhym kam kam kĩnh ne. Ne kum,

—Ga ne ga ajaxwe kêtumrêx. Aje imã õrja ne ba imã kĩnhkumrêx, ane.

Be, nãm tu amikajmã'ã Metĩndjwỳnh ma. Amrêbê ne ty. Nãm te tyn mã me bamã mỳjja jarẽ. Tĩn mãn prabê mã me bamã arẽ ne,

—Dja ga me ã ikudjwa amim Metĩndjwỳnh maro ane.

⁵Nãm ã Enokidjwỳ amikajmã'ã Metĩndjwỳnh maro anen kam tyk kêt. Nãm Metĩndjwỳnh tu tĩn rã'ão wabi. Nhym me te noo abej aprã. Nhym kêtumrêx, Metĩndjwỳnh kute tu tĩno àbirkam. Kute o àbir kêtĩri ne 'ã memã kum,

—Tãmjakam ne ba ikĩnhkumrêx, ane.

Nãm ã Metĩndjwỳnh ane. ⁶Bir be, nhỹnh ne me'õ amikajmã'ã Metĩndjwỳnh mar kêt nhym we kam kĩnh? Kati, me kute amikajmã'ã Metĩndjwỳnh marbit

ne mekam kînh ne kum me kînh. Godja me'ô Metîndjwýnh'ýr bôx prâm jabej gora amikajmã'ã Metîndjwýnh ma. Metîndjwýnh ne tîn ne ar ban kam mekam ukaprîkumrêx ar ba, me kute Metîndjwýnh mar prâm ne kute abejja mekam ne ukaprî. Ja dja me amikajmã'ã kuman kam kôt Metîndjwýnh'ýr bôx.

7 Nãm ã Nôwedjwý amikajmã'ã Metîndjwýnh maro ane. Metîndjwýnh ne kum tîn jadjà. Anhýr djwýnhrà m kute amirît kêtri ne kum ngô tám jarê. Nhy m kam Nôwe umaje kà rax nhípêx ne kam kum prômê kramê upânhmê aro wadjàn ar utàn ar aro ba. Nhy m ate me kum mã axwe kînhja ne me tu ate krân ar ban kam tu biknorkumrêx ne. Nhy m bep Nôwe pydji ne amikajmã'ã kuma nhy m Metîndjwýnh arým kum axwe kêt jarê.

8 Nãm ã Abraødjwý amikajmã'ã Metîndjwýnh maro ane. Nãm Metîndjwýnh atemã kum pyka ny jarên 'ýr ano nhy m tẽ. Nãm kum kabên pydjin arên kum, —Dja ba amã kungã ga tu o anhô pykakumrêx ne kam kam ar aba, ane.

Nhy m kabên man kam tu 'ýr tẽ, kute amikajmã'ã pyka pumûnh kêt 'ýr ne tu tẽ. 9 Nãm tu amikajmã'ã Metîndjwýnh ma. Amikajmã'ã kuman pyka nyja kam ar ba. Metîndjwýnh kute kum pyka jarên ja kam ar ba. Me bajtem nhô pykakam ar ba. Nãm mrykào kikrekam ar ba. Krabê Idjakmê tãmdjwýbê Djakomê ro'ã mrykào kikrekam ar ba. Metîndjwýnh kute Idjakmê Djako ar adjwýnhdjwýmã kute pyka jarênhamê ro'ã mrykào kikrekam ar ba. 10 Mýkam ne Abraão mrykào kikrekambit ar ba? Bir, kýrûm Metîndjwýnh kute amim krî mex'ã karôn kute prîne ipêxa kamnhîxbê ne pykabê mrykào kikre jakam ar ba. Krî mex rã'ã rã'ã, krî môr ne tûm ne rôrôk kêt, tám ne amim kamnhîxbê ar ban mar ar o ba.

11-12 Nãm ã Xaramê mjênbê Abraødjwý amikajmã'ã Metîndjwýnh maro ane. Nãm ar te kra prãme ar ba nhy m arým Xara bêngêxte. Te kubêngêxte nhy m kam kra wajêt ne ruw nhy m amim kumý. Metîndjwýnh arým kum kabên pydjin arên kum kra jarê nhy m kam Xara amikajmã'ã kuman kam, —Metîndjwýnh ne kabênkumrêx, ane.

Nhy m kam kute kum kra jarênja wajêt ne ruw nhy m kumý. Te kubêngêxte ne amim kra mý. Kam ne Abraão pydji kurûm me kamingrãny apôx ne kumex. Arým kubêngêtte kute amikam kô krân mexo tẽmkam ne kra dji. Nhy m amû aben nhîjuk'ã kam tãmdjwý aptàn kumex. Tãwã pydji kurûm ne me krãptî apôx ne kam kam aptàn kumex ne kute mrãmri kàjkwakam kanhêtire pyrâk. Ne kute ngô rax mýrri pykati ngrà ja pyrâk. Pykati ngrà tám ne me o itun te kute abenã akremã nhy m krãptî: anen amû ajkamê nhy m me te o ane. Nãm ã kam tãmdjwý amû aptâr ne kumex o ane.

13 Ije ar amã ar tûmre jarênja ne ar kunî amikajmã'ã Metîndjwýnh mar rã'ãn ty. Metîndjwýnh kute kabên pýnho memã mýjja jarênja, kabên ja jarên ja ne ar kraxje kute amim byr kêt ne ty. Nãm ar kute amybým noo omûnhmãn prabê amikukãm kuman tu amikam kînhkumrêx. Ne memã kum, —Me bajtemkam ne bar iba. Me ô pyka prokam ne bar iba. Pyka ja ne inhô pyka djwýnh kêtumrêx, ane.

¹⁴Me ja ne me kute ô pyka jabej râ'ă, kute kàjkwakam ô pyka djwỳnhja jabej râ'ă kam ă kabēn ane. ¹⁵Năm ren ar ô pyka kurũm kator ja tēn o aman arỳm ren mǎ ajte akubyn 'ỳr tē. ¹⁶Nhym bep kati, kàjkwakam ar ô pyka mextire ja ne ar o aman kam 'ỳr tēm prāmă ne kam ă kabēn jarēnho ane. Kam ne Metĩndjwỳnh kum ar kĩnhkumrēx. Nhym ar kute Metĩndjwỳnhmă kum,
—Ar imă akĩnhkumrēx. Apydji ne ga abê ar itĩn djwỳnh, anhỳrkam djām kam Metĩndjwỳnh jām Ar kubê krāmă got, arkam pijāmmă got. E kum kati, kum ar kĩnh raxkam ne ar kutêp krĩ mex nhipēx ne.

¹⁷⁻¹⁸Năm ă Abraão amikajmă'ă Metĩndjwỳnh maro ane. Năm Metĩndjwỳnh Abraão kute Metĩndjwỳnhkôt ar amijo ba jabej kabin kra'ă ku'uw. Nhym bit kute krabê Idjak bĩnmă, kute bĩn ne kum ôrmă bit kute bĩnmă. Amrêbê Metĩndjwỳnh kute kum kra pydji jarēn ja ne bit kute kum bĩnmă. Kra ja'ă, kra pydji ja'ă ne Metĩndjwỳnh kute kum,
“Akrabê Idjak ja gêdja amũ aben nhijuk'ă kam tãmdjwỳ krãptĩkumrēx”, anhỳrja.

Kra ja ne Metĩndjwỳnh kum arê nhym kam bit kute bĩn ne kum ôrmă. ¹⁹Năm ôkre kadjwỳnhbê amim,

—Metĩndjwỳnh dja akubyn imă o tĩn, ane. Ne kam bit kute bĩnmă nhym kam Metĩndjwỳnh nêje kukràn akubyn kum nê ne kam mrāmri kute akubyn o tĩn pyrāk.

²⁰Năm ă Idjakdjwỳ amikajmă'ă Metĩndjwỳnh maro ane. Ne kam krabê Djakomê Ixau arkum kĩnh djà jarê, ar kukām ne arkum kĩnh djà jarê. Ar ô mỳjja kute amirĩt kêtĩrĩ ne ar kukām amũ arkum kĩnh djà jarê.

²¹Năm ă Djakodjwỳ amikajmă'ă Metĩndjwỳnh maro ane. Năm amũ krabê Jôdjekam kra amê aro kĩnh. Arỳm kubêngêtte, arỳm bikati mex ne kam mōn amikakêkôt kajpar djà djan kam Metĩndjwỳnhmă rax jarēn kam tãmdjwỳjamă kum,

—Gêdja Metĩndjwỳnh ar ajo kĩnh, ane. Năm ă arkum ane.

²²Năm ă Jôdjedjwỳ amikajmă'ă Metĩndjwỳnh maro ane. Tyk kută ne amũ anhỳr djwỳnhhràm mekbê idjaer pykabê Edjitukurũm katormă arê. Ne prĩne memă ta amiji'ă karô, me kute 'io mōrmă ne memă 'ă karô, me kute 'io mōr ne kute ô pyka djwỳnhkam adjārmă, Metĩndjwỳnh kute kum pyka jarēnhjakam kute adjārmă.

²³Năm ă Môjdjê nāmē bãmdjwỳ amikajmă'ă Metĩndjwỳnh maro ane. Năm ar rwỳk totokbê o apdju. Bēnjadjwỳr raxbê Parao ne me kra my apôx nhym me kute me parmă arê. Nhym arkum bēnjadjwỳr rax kabēn pyma kêt mex ne tu o apdju, ar kute bĩn kêt ne tu o apdju. Năm ar kra mextire pumũn kam Metĩndjwỳnh kanàrràm tu o apdju. Nhym o bipdjur'ă mytyrwỳ amānhkrut ne ikjêkêt nhym kam ar têtêktikam kunhō.

²⁴Năm ă Môjdjêdjwỳ amikajmă'ă Metĩndjwỳnh maro anen kam arỳm abatàn ne kam krô'ă nāja kanga. Parao kra kute amim prĩrũm mỳnhja tãm ne nã kanga. ²⁵Năm,

—Kwārīk wānh ba ijaxwejao amikĩnh kêt. Kwārīk wānh wām memã nõ. Godja ba arīk ar ibaja kwỳ ngrire ne o amikĩnh? Kati, gêdjām wām kunĩ nõ. Ba gêdja ba Metĩndjwỳnh nhõ me jakõt itokry, ane. ²⁶Môjdjê ne Kritu kajmã'ã tokry, Bẽnjadjwỳrbê kumkati kajmã'ã tokry. Nhyam amũ tũmrãm Kritu bõx ne adjwỳnhdjwỳ kõt kudjwa tokry. Nãm me kum kurên aprỳn prĩne o ajkê nhyam tokry rax ne. Nhyam Môjdjêdjwỳ Kritu kajmã'ã kàjbê ã tokry ane.

Nãm,

—Kwārīk wānh me kum ikurên wānh ijaarỳ kwārīk wānh rã'ã. Ba gêdja ba Bẽnjadjwỳrbê kumkati kajmã'ã itokry, nhyam bep ate gêdja Edjitukam nêkrêx kumexja wānh memã nõ. Nhyam bep ba dja ba Bẽnjadjwỳrbê kumkati kajmã'ã itokry. Tãmbit ne ba imã kĩnh, ajbit ne imã mex, ane. Nãm amũ amikukãm Metĩndjwỳnh kute kum pãnh mỳjja mextire nhõrmã amikukãm kuman kamnhĩxbê ar ban kam ã o ane.

²⁷Nãm ã amikajmã'ã Metĩndjwỳnh maro anen kam kum bẽnjadjwỳr rax puma kêt mex ne pykabê Edjitu kurũm kato. Bẽnjadjwỳr rax te kam ngrỳ:k. Nhyam kam kum uma kêt mex ne tu kurũm tẽ. Kute noo amim Metĩndjwỳnh pumũnh pyræk. Metĩndjwỳnh pumũnh kêtja ne kute noo omũnhmãn prãbê akrãmã amijo ba rã'ã ne akubyn akêx kêtukumrêx ne.

²⁸Nãm ã amikajmã'ã Metĩndjwỳnh maro anen kam Metĩndjwỳnh me irõbê mrãnh nhõ akati man kam me kute kamrõo kikre'ã ijê djã kamĩnmã memã arê. Metĩndjwỳnh kadjy mrãnh djwỳnh kute me imexmã me irõbê mõi ne kute mekbê idjaer kutewa par kêt kadjy. Nãm tu amikajmã'ã kuman kam me kute kamrõo kikre 'ã ijê djã djymã memã arê nhyam me o amiptãro ba.

²⁹Nãm ã mekbê idjaerdjwỳ amikajmã'ã Metĩndjwỳnh maro anen ngõ rax nhidjibê Kamrêk'ỳr bõx nhyam tu memã ngõ ngrã rê nhyam me kam 'ã mõi rê. Mrãmri ne kute atỳxkam pyka ngrã ja pyræk, nhyam me kam mõi 'ã rê. Nhyam mekbê Edjitu mekõt me kudjwa bit 'ã rêrmã mõi nhyam tu ngõ meo ajkamuw ne me imex ne.

³⁰Nãm ã mekbê idjaer amikajmã'ã Metĩndjwỳnh maro anen krĩraxbê Djeriko nêje pyka tỳx nhipõkjamã ipõko dja. Nãm me Metĩndjwỳnh kabên man kam kabênkõt krĩmã ipõko dja. Nhyam akati nhyam me ajte tãm ne. Nãm me ã kum ipõko anhyõro dja nhyam me'ã akati amãnhkrut ne amãnhkrut ne amãnhkrut ne ikjêkêt nhyam arỳm nêje pyka tỳxja te tỳx ne tu ajkaten rõiok ne kumex. Nhyam kam 'ãnh mekbê idjaer kurê djwỳnhja'ỳr wadjàn me'ỳr prõt ne.

³¹Nãm ã me kuprỳ 'õbê Rabe amikajmã'ã Metĩndjwỳnh maro anen kam amiwỳr mekbê idjaer àpkãro mrãnh djwỳnhho wadjàn arkum kabên mex jarên ar udju ne. Kam ne mekbê idjaer me kute Metĩndjwỳnh kabên mar prãm kêtja kunĩ nhimex ne kam kute Rabe ar bĩn kêt nhyam ar ajbit me kurãm tĩn ne.

³²Bir be, djãm arek ar amã me'ã idjujarênh itẽmmã? Nār kon, birãm aje. Dja ba Djidjiaomẽ Barakimẽ Xãxãomẽ Djetemẽ Dawimẽ Xamuwemẽ Metĩndjwỳnh kabên jarênh djwỳnhmẽ me ja kunĩ'ã idjujarênh tẽ nhyam arỳm ijã akamãt ne.

³³Nām me amikajmā'ā Metĩndjwỳnh man kam kurê djwỳnh'ỳr prõt nhyṃ Metĩndjwỳnh memā me kurê djwỳnh rerek mex ne, nhyṃ me mekbê pyka pytā. Nām me katāt meo ba nhyṃ kam Metĩndjwỳnh kabēn pỳnho memā mỳjja mextire jarē. Nām me Metĩndjwỳnh kanàrrām kum rop djàkrêbê rijāo pyma kêtukumrêx ne. Rop kute krēnmā ne me rop nhũrkwākam kumē nhyṃ Metĩndjwỳnh rop jajkwa ajmā o nhyṃ ajkwa pôt ne krēn kêtukumrêx ne.

³⁴Nām me Metĩndjwỳnh kanàrrām kum kuwy pyma kêt mex ne. Me kute kuwymā ar rēnh nhyṃ ar xêt kadjy nàrrām ne me kuwy pôk jabatānhmā ar kurē nhyṃ Metĩndjwỳnh ar'ā kuwy bĩn ar utā. Nām me Metĩndjwỳnh kanàrrām ar ba nhyṃ me bit kute pao me imexmā nhyṃ Metĩndjwỳnh me utā. Nām me Metĩndjwỳnh kanàrrām ar ban katyk mex ne ar ba nhyṃ Metĩndjwỳnh akubyn meo tỳx. Nām me abenwỳr prõtkaṃ Metĩndjwỳnh kanàrrām ar ban kam amijo aptān kàjbê kurê djwỳnh rē nhyṃ me bajtemja me umaje prõt. ³⁵Nhyṃ me niredjwỳ amikajmā'ā Metĩndjwỳnh ma nhyṃ akubyn memā ôbikwa kwỳo tĩn.

Nhyṃ be nām me kwỳ amikajmā'ā Metĩndjwỳnh ma nhyṃ me me kupa. Nām me te memā kum,

—On me Metĩndjwỳnh kanga ba me me apar kêt. Dja ga me mā 'ā angrā ba kam me prĩne me ajo ajkê, ane. Te memā ane nhyṃ me amibê kanga kêtukumrêx ne 'āno dja. Metĩndjwỳnh kute akubyn meo tĩn nhyṃ me ô pyka mextirekam ar bamā ne me kanga kêtukumrêx nhyṃ me prĩne meo ajkēn me par punu nhyṃ me tokry:n ty.

³⁶Nām me me kwỳ japrỳn me'ā keket ne kam me kaprêprê:k ne prĩne mrykào me kà noxnox nhyṃ kam mrykàkôt me kamrô kukrykry ne. Nām me me kwỳ djuwpren mekbê ijê djàkam me kurê. ³⁷Nām me kēno me kwỳ titik ne me kupa. Nām me pĩ kokjêr djào, kàxkakjêro me kwỳ jakàn me kupa. Ne kàxdjwa kajgoo me kwỳ pa. Nhyṃ me amim mrykĩ'atomti, mokaàk kào kubêkàn kayn angij. Me ô mỳjja kêtkaṃ me ô nèkrêx kêtkaṃ ne me ar ba. Nhyṃ me prĩne meo ajkê nhyṃ me tokryn kaprĩre ne ba. ³⁸Nām me kapôt kukritkaṃ ar ba, krānhrekam ar ba, kēnkrekam ar ba, pyka krekam ar ba. Ām me mexkumrêx. Pykabê me ja ne me mexo me ja tēp kêtukumrêx ne.

³⁹Bir be, me ja kunĩ ne me amikajmā'ā Metĩndjwỳnh ma. Nhyṃ kam Metĩndjwỳnh ne me jamā,

—Mrāmri me amexkumrêx. Nā bām me akam ikĩnhkumrêx, ane.

Nhyṃ bep kraxje me tũmre ja kute byr kêt rā'ā. Metĩndjwỳnh kute kabēn pỳnho memā mỳjja jarēnhja ne me kute amim byr kêt rā'ā. ⁴⁰Adjỹm, Metĩndjwỳnh ne arỳm me bakadjy amim mỳjja mex'ā karō. Me bakunĩ kadjy ne prĩne amim mỳjja'ā karō mextire. Djā nām kute me tũmrebit pytārmā? Kati, arỳm ne me bajādjwỳ amim karō. Nhyṃ kam mexkumrêx. Mexo kute me tũmre pytārja jakrenh mexi. Kute me tũmre jamē ro'ā kute me bajo mexmā. Gu me batipydjĩn bamexo bamexkumrêxmā ne amim me bajā karō. Be, tām ne ja.

Metĩndjwỳnh kra kunĩmã uwěk măt.

12 ¹⁻²Be, me kume:xja pumũ. Me kute amikajmã'ă Metĩndjwỳnh marja me tãm ne me krăptĩĩ. Me tãm ne ne me bamã ipôk ne me banhirăn kumex. Kam dja gwaj me ja kudjwa Jeju 'ăno djan kanga kêt. Ě, mrămri ne me kute aben rerkam mỳjja kute me kukrà nhym me kute o pôx ne amikôt rênh ne kajkrit ne prôt mex ja pyrăk. Dja gwaj ă mỳjja kute gwaj bakukràja jăm aminêje kunĩ rênho ane. Gwaj bajaxwe kute gwaj bajamỳnh tỳxja jăm aminêje kurên kurên kam arỳm mrămri bajaxwe kêtka katăt ar amijo baba mexkumrêx ne. Gora gwaj 'ă badjukanga kêt ne mrămri katăt amijo tên inomă kumê. Kute mrămri ne me kute aben rerkam amikukăm mỳjja pumũnh ne kam kambit no pymjỳr tỳx mex ne atemă mỳjja 'ô pumũnh kêt ne 'ỳr prôtja pyrăk.

Dja gwaj ă o anen amikukăm Jejubit man kôtbit bajamak bën ne baje ibej atemă mỳjja 'ô mar kêt ne Jeju'ỳrbit baprôt ane.

Jeju ta ne gwaj bajamak bô gwaj tu amim mar kumrêx. Nhym ajte gwaj bajamak bônho tẽ gwaj arỳm amim mar rax ne. Tãm dja gwaj 'ăno djan kanga kêt ne. Năm amũ amikukăm kĩnh djă man kam mete pĩte'ykam bĩnja kum uma kêtumrêx. Djăm me pĩte'ykam arikkam pijăm ngri got. Năm amikam pijăm mar kêt ne tu ate krăn arek amijo tẽ. Kam ne Metĩndjwỳnh arỳm 'ă bẽnjadjwỳr rax mẽ nhym Metĩndjwỳnh krĩ djătikam ubôk'ănh ikô'ă nhỹ.

³Gora ar amikam Jeju man amikam arerek kêt. Me axwe ne me kum kurên prĩne o ajkê nhym kam tu arek dja, tu ate krăn dja. Gora ar aman kudjwa arek o tên amikam arerek ne akaprĩ kêt ne arek kôt o tẽ. ⁴Djă nă găm ar Jeju kudjwa akamrô ajkapĩn ty got? Kati, ar ajaxwebê aku'ê tỳxkam kraxje ajô akamrô bikapĩn kêt. Kraxje me kute ar ajô bĩn kêt ră'ă.

⁵Djăm arỳm ne gar Metĩndjwỳnh kabênja o akno? Arỳm kute ar ajo kran kam kute ar amă tỳx jadjarmă ja. Djă nă găm ar o akno? Năm ar amă,

“Ě, akmere, gêdja Bẽnjadjwỳr amă uwěk măt kwărĩk wănh ga aprỳ kêt ne kam amikati kêt. Gêdja amă bën tỳx ga akaprĩ kêt. Mỳkam?

⁶Bir, kum me abêjamă ne uwěk măt. Ne kute meo krajadjwỳ kunĩmă uwěk măt ne, me katăt mrănh kadjy”, ane.

⁷Bir be, Metĩndjwỳnh kute ar amă uwěk mătka dja gar tu arek dja. Kôt ne Metĩndjwỳnh kute ar ajo kra. Nhỹnh ne me prĩre 'ô băm kute kum uwěk măt kêt? ⁸Bir be, Metĩndjwỳnhdjwỳ kute kra kunĩmă uwěk mătja pumũ. Me katăt mrănh kadjy ne kramă uwěk măt. Mỳj me ne Metĩndjwỳnh memă uwěk măt? Kute me bajo kra djwỳnhja. Năm ren kute gajbit amă uwěk măt kêt ga ren abê kra djwỳnh kêtumrêx ne ren kam abê krô'ă me kute adjir pyrăk.

⁹Ga me babăm bêngôkre kute me bamă uwěk măt gu me bapijăm djăje banhibôn bakrĩn amikam baje kabên maro bakrĩja pumũ. Bir be, gwaj pykabê gwaj babămja kurăm kăjkwakam Babămja kabên maro nhỹ, gwaj badjumar mex ne ar baba kadjy, amikam kabên maro nhỹ. ¹⁰Pykabê gwaj babăm

bêngôkre kute gwaj bapřirerũm gwaj bamã uwêk màt. Me ta kute amimarkôt ne gwaj bamã uwêk màt ne. Nhym bep Metĩndjwỹnh ne gwaj bamex kadjybit gwaj bamã uwêk màt ne. Ta mexo mexkumrêx kôt gwaj bamex kadjy.

¹¹ Džãm me kute memã uwêk màtkam tokry ngri got. Kam ne me tokry:n kam kapřire ne. Nhym bep amũ atũmã gêdja arỹm umar mex ne katàt mrã. Arỹm kute mar ne kôt amijo tẽmkam gêdja umar mex ne katàt mrã.

¹² Bir be, kam dja gar on ajte amikam atỹx ne arek kôt amijo tẽ. Kute mrãmri ne me krĩ'ỹr mrãnh ne katyk me:x ne mrãnh ne kõno birẽnh mrãnh ne kute krĩo rãm ne jao mrãnh ne arỹm ajte ãmẽ ikra ãdjõnh ne arỹm ajte mrãnh tỹx ne arỹm arek mrãnh ja pyrãk. Dja gar ã amikam atỹx ne arek kôt amijo atẽm o ane. ¹³ Nã, dja gar kôt amijo tẽn katàt amiprywã djin arek 'ã mõi, katàt ar abenkôt amrãnh kadjy. Gar aje Jeju mar tũmwã arek me kute amim Jeju mar rerekwãmã mõi amõi mexo mõi gẽ me arek ar akõt mõi. Ar akõt mõi 'õ abenbẽ màt kêt. Me kute amim Jeju mar rerek ne me kute mrãmri ne me mex mã ba nhym me par tãtãk mekõt 'ok ba pyrãk. Gêdja kute mar rerekrewã ar akõt tẽm rerekre ne tẽn kam arỹm amũ tẽm tỹx ne arỹm amũ mrãnh mex, arỹm Jeju mar tỹx ne.

Me kute axwebê amijãno ãmmã.

¹⁴ Gora ar amũ me wã kunĩmã akabẽ mexbit jarẽn angryk kêt, gar kam adjumar mex ne ar aba. Gora ar Metĩndjwỹnh mexo amexkumrêx. Kam dja gar Metĩndjwỹnh pumũ. Dja gar Metĩndjwỹnh mexo amex kêt ne Bẽnjadjwỹr'ỹr abõx ne omũnh kêtumrêx ne.

¹⁵ Ë, Metĩndjwỹnh ne ukapřikõt me utã. Gora ar amijãno dja, ar ajõ Metĩndjwỹnh djukapřijabẽ jãm akrãn 'ỹr abõx kêt karõ. Gora ar amijãno dja. Dja gar ajõ ajaxwemo krax ne kam aje mỹjja djỹ pyrãk, aje akrõre djỹ pyrãk. Kute mrãmri ne me kute akrõo tep ka'õnh nhym kute prĩne ngõ jaẽr ne kute tep nhimexo ba ja pyrãk. Gora ar amijãno dja. Dja me'õ axwemo krax ne kam amikõt me akrãptĩmã axwe jangij. Gora ar amijãno dja.

¹⁶⁻¹⁷ Ne ajte ar ajõ aprõ prãm karõ nhym me niredjwỹ 'õ mjẽn prãm karõ gora ar amijãno dja. Kwãřĩk wãnh ar ajõ abẽ Ixau kêt. Gora ar amijãno dja. Ixau ne pykabẽ mỹjja kakřitjabit kum kĩnh ne kam kỹjrũm mỹjja mextire ja kum kĩnh kêtumrêx. Ixau ne kutewa nhym kam kôt bãm kute Metĩndjwỹnhmã kum,

—Dja ga o rax ne o kĩnh, anhỹr kadjy nãrãm kute kum õ nẽkrêx kunĩ rer kadjy nãrãm bit 'ã no tỹx.

Nhym Ixau kute àkurbit mar ne kam kamyjamã õ kwỹ krẽn djã pydji pãnh mỹjja kunĩ kanga. Nhym kam tũmrãm kum kĩnh ne kam te 'ã o ane. Nhym bãmjã nẽ ne. Nhym amim ngryk ne te mỹrkam 'ã bãmo ane. Nhym tu ate krã. Ja ne gar arỹm ama. Gora ar amijãno dja.

¹⁸ Ë, ate ne Metĩndjwỹnh amrẽbẽ me bakukãmãremã kukràdjã tũmjao kato nhym bep ate ne ajbir me aga akamingrãnydjwỹmã kukràdjã nyo kato.

Amrẽbẽ ne me bakukãmãre krãnhbẽ Xinaj'ỹr mõi bõx. Nhym pô:ko nhỹ nhym kũm kakřãtyk ne kum ipõk nhym kam kam akamãt kô ty:k ne. Nhym nadjwỹ

kam krar ne adjênho dja. ¹⁹Nhym potidjwý kakôr tỳx ne, nhym Metĩndjwýnhdjwý òkreti:rekam kabên. Nhym me kuman kam umaje amra:n kum,

—Kwārĩk wānh ga ajte me imā akabên kêt, ane. ²⁰Nhym Metĩndjwýnh arỳm memā,

“Kwārĩk wānh me krānh kupênh kêt. Dja ga me abêngôkre 'ô nār mry 'ô krānhreja kupê ga me arỳm kēno titik ne abĩ”, ane.

Nhym me kuman kam umaje àmrao kumex. Te ku'ê tỳxmā. ²¹Nhym Mòjdjêdjwý omũn kam,

“Ije kum bep imā uma. Nā bām umaje itertet ne”, ane.

Djām uma ngri: got. Nām ā pykabê Metĩndjwýnh nhō krānh ane. 'Ỳr ne me bakukāmāre bōx.

²²Nhym bep ajbir ne Metĩndjwýnh me akamingrānymā kukrādjà nyo kato ga kam ar krānhbê Xijāo, Metĩndjwýnh nhō pyka'ỳr mōn bōx. Kàjkwakam ò pykabê Djeruxarê'ỳr bōx. Kam ne Metĩndjwýnh tĩn ne ar ba, nhym kadjy mrānh djwýnhdjwý kamā ar ba. Kadjy mrānh djwýnh krāptĩ:. Me'ā akre kubê 1.000.000 krāptĩ:. Nām me'ā akre kute pi'ô pyrāk ne kĩhtire ne kute Metĩndjwýnhmā rax jarēnhmā ar aben pydjĩn ba.

²³Kamādjwý ne Metĩndjwýnh nhō me ja kunĩ aben pydjĩ. Metĩndjwýnh nhō me ja kumrêx kute amikajmā'ā marja ne me aben pydjĩ. Amrêbê kute kàjkwakam pi'ôk no'ôkkam me idji janhōrja tām ne arỳm kamā 'ā aben pydjĩ. 'Ỳr ne gar bōx. Bēnjadjwýr rax kute me kunĩmā pānh jarēnh djwýnh kubê ne Metĩndjwýnh, 'ỳr ne ga me bōx. Ne ajte me karō, me pykakam ar bari katāt mrānh nhym Metĩndjwýnh kute me'ā mex rēnh, me ja karō'ỳr ne gar bōx.

²⁴Be, Jeju'ỳr ne gar bōx. Jeju kute me bamā kukrādjà ny jarēnh māmđji ne kute o kator, ne kute ta kamrô bikapĩnkôt me bajo mex, 'ỳr ne gar bōx. Jeju kamrô kute mexo Abeu kamrô jakrenh mexi. Amrêbê ne me bakukāmārebê Abeu tyn kamrô ajkapĩ nhym me omũn kam pānhbit jarê,

—Gora gê on o pānh, ane.

Nhym bep me kute Jeju kamrô markam ne me,

—Metĩndjwýnh ne Jeju kamrôkôt tu me bajaxweo akno, ane.

Be, Jeju mextire'ỳr ne gar bōx.

²⁵Bir be, kam ne ba ar amā,

—Gora ar amijāno dja gê Metĩndjwýnh ar amā kabēno dja. Kwārĩk wānh ar ajō kabēnbê jām akrā kêt. Gora ar ama.

Ê, amrêbê Mòjdjê kute pykabê memā kabên jarēnhkam me'ô kabēnbê jām krān ar ba djām kute kum o pānh kêt mā? Kati, Metĩndjwýnh ne prĩne memā o pānh. Nhym bep ajbir ne Metĩndjwýnh kàjkwa kurũm me bamā kabên jarê. Nhym mexo amrêbê pykabê kabên ja jakrenh mex ne. Be djām gwaj badjwý kabēnbê jām bakrā djām kute gwaj bamādjwý o pānh kêt mā? Arkati, dja prĩne gwaj bamādjwý o pānh. Me kute Metĩndjwýnh kabên marbê jām krāja gêdja meo bikēnh mex ne, ne kam me kute Mòjdjê kabên marbê jām krā ja pānh akrenh mex ne.

²⁶Amrêbê ne kabêno pykabit karngôr kajgo nhym tertet. Nhym bep ajbir ne kabên pydjîn arên memã,

“Djãm pykabit ne ba ije karngôrãm? Dja ba ã ajte kàjkwadjwỳ karngôr”, ane.
²⁷Be, kute “Dja ba ajte” anhyrja ma. Metĩndjwỳnh kute mỳjja kunĩ nhipêx ja gêdja ajte karngôr nhym tu apôx ne rôrôk ne kunĩ akuno. Nhym bep mỳjja jarij tỳxjabit dja arek arij. Tãm ne rôrôk prãm kêtumrêx.

²⁸Be, Metĩndjwỳnh nhô mỳjja dja rôrôk prãm kêt kumrêx. Metĩndjwỳnh kute ô pykakam ar me bajo baja gêdja tỳm prãm kêtumrêx ne arek gwaj bamã nôr rã'ã rã'ã ne. Tãm ne me bamã arê gwaj tu 'ỳr babôxkumrêx. Kadjy, Metĩndjwỳnh kute ô pykakam ar me bajo baja tỳm prãm kêt tãm ne gwaj bamã nôr rã'ã, kadjy dja gwaj bakĩnhkumrêx ne ar baban kum amikĩnh jarê. Kum amikĩnh jarên kum rax jarên kam kum badjapênh mextire gê gwaj bakam kĩnhkumrêx. Gora gwaj kam bapijãm ne bamã uma. ²⁹Djãm uma ngri got. Dja prĩne meo apêx. Kute mrãmri ne kuwy pôkti kute prĩne mỳjja bôr ne o apêx ja pyrãk. Dja ã Metĩndjwỳnh meo apêxo ane.

Kute memã 'ã karôo ino rer.

Kor 1.10; Tex k 4.1; Ped k 2.11

13 ¹Gora ar abeno akamyn mã amã aben jabê rã'ã. ²Gora ar me bajtemwã man anhũrkwãmã amiwỳr meo wangjê ne mekam adjukapri. Nãm ne kwỳ ã anen aminhũrkwãmã kadjy mrãnh djwỳnh kwỳo wangij ne o djuw mex. Kute kraxkôt mar kêt ne tu o djuw mex. ³Ê, gora ar mekbê ijê djakam ar ku'êja ma. Dja gar gadjwỳ aje ar ro'ã mekbê ijê djakam aku'ê mãn prabê ar ô'ã atokryn akã djàn akaprin ar aba. Kwãrik wãnh gar ate akrã kêt. Dja gar ã arkôt ane. Me kute prĩne aro bikênh nhym ar tokryjadjwỳ gora ar ar ama. Dja gar ar ô'ã akã djàn atokry ne. Be, tãm ne ja. Gêdja ba ajte ar amã mỳjja 'ôdjwỳ jarê.

⁴Me abenwỳr bakam ne mrãmri mỳjja mexkumrêx. Dja gar aprô'ỳr aban kam aprô djwỳ:nh'ỳrbit mrã. Nhym me niredjwỳ mjên djwỳnhbit ma. Me kwỳ ne me me prô prokam no kêt ne. Nhym bep ar ga. Ar ga dja gar akunĩ me prô prokam apijãm ne aprô pỳnh ne. Kwãrik wãnh ga ar krô'ã aprô kêt, gê me nija krô'ã mjên kêt. Me prô prãm, me mjên prãmja dja Metĩndjwỳnh memã pãnh jarê. Me kute me'ôbê prô nàr mjêno àkĩnh jamãdjwỳ pãnh jarê.

⁵Kwãrik wãnh gar pi'ôk kapri prãmebit ar aba kêt. Dja te ar anhô mỳjja ngrire gar tu o amikĩnh. Mỳkam? Bir, Metĩndjwỳnh ta dja ar ajo djuw mex. Arỳm ne ar amã,

“Dja ba me akurũm itêm kêtumrêx.

Dja ba me akanga kêtumrêx.

Dja ba me ajo iba rã'ã rã'ã ne”, ane.

Ga Metĩndjwỳnh kute ar gwaj bajo ba rã'ãja pumũ. ⁶Bir be, kam dja gwaj batỳx ne banhôkre kadjwỳnhbê amim,

“Metĩndjwỳnh ta ne kute ijo ba djwỳnh.

Kam dja ba itĩn prãm kêt.

Mã ne me kute ijomã”? ane.

Dja gway ã amim ane.

⁷Ë, gora ar kute ar ajo ba djwýnh ma, ar kute ar amã Metíndjwýnh kabên jarênhja dja gar ama. Ar kute kôt amijo ba mex rã'ân ar ty. Ga ar kute amikajmã'ã Jeju mar ne 'ã ngrã týx ja pumũ. Ar ta ne ar arým ty. Ar ja dja gar amikam ar aman kam ar'ã amijakren ar aba. ⁸Nã, nãm ar amikajmã'ã Jeju ma. Jeju Kritu pydji. Atemã kêt. Amrêbê tãmý ne ajbir ajte tãm ne. Tãm gêdja rã'ã rã'ã rã'ã ne. ⁹Kwãrik wãnh me kute apýnh mýjja'ã ujarênh nyo ar anoo biknor ar o baja kwãrik wãnh o ar anoo biknor kêt. Metíndjwýnh ta ne ukapríkôt gway bajo týx gway katàt mrã. Kam ne mexkumrêx. Bep ate ne me ta kukràdjàkôt mekbê me àkur djã pyma. Kam ne punure. Nãm me te o anen arík ar ba.

¹⁰Ate ne me bakukràdjã ny. Kritu ta ne Bãmmã me bakadjy amingã nhym me kubĩ. Nhym me bajaxwe pãnh ty. Nhym bep me kute kukràdjã tũm ar o ba rã'ãja, me Metíndjwýnh nhõ kikrekam àpênh ja kute Jeju me bamã tykja mar kêtumrêx, ne Jeju nhõ kukràdjã nyja mar kêtumrêx. Nhym Metíndjwýnh kute me ja jaxweo biknor kêt ne kute meo kra kêtumrêx.

¹¹Kukràdjã tũmkôt ne me kadjy Metíndjwýnh mar djwýnh nhõ bënjadjwýr rax mry pan kamrôo atom ne o tẽ. Metíndjwýnh nhõ kike kadjwýnhbê kumoka'êmã o tẽn o wadjã. Me axwe pãnh ne kum kungã. Metíndjwýnh kute omũnh ne me axwekam ngryk kêt kadjy. Nhym bep mry nhija ne me atykmã kum angij nhym prĩne xêr. ¹²Kôt ne Jeju atykmã tokryn ã tyk ane. Ta kamrôo kute prĩne me bajo mex kadjy. ¹³Kam dja gway atykmã jêt djãja'yêr tẽ. Kôt gway batokry nhym me kute kôt gway bajapry gway kudjwa bapijãmmã.

¹⁴Djãm pyka jakam ne gway banhõ pyka? Kati, nhym bep amrê mör rĩnã ne gway kam ama nhym rã'ã rã'ã rã'ãmã. Kam dja me gway bajapry gway ate bakrã. Kwãrik wãnh rã'ã. Mrãmri dja tu ã ane. Kýjrũm ne gway banhõ pykakumrêx, gway banhõ krĩrax djwýnh. ¹⁵Bir be, gway banhõ pyka gway bamã nör nĩkam amakbê mã Metíndjwýnhmã mex jarênh rã'ã ne. Gway baje amikajmã'ã Jeju markam dja gway ã Metíndjwýnhmã anhýr ar baba rã'ã ne. Gway baje Metíndjwýnhho aminhõn baje idji jarênh ar o babaja dja gway õ ane. Kam dja Metíndjwýnh gway bakam kĩnhkumrêx nhym kam mrãmri kute amrêbê mete Metíndjwýnhmã mry par ne kum õr nhym mekam kĩnhkumrêx ja pyràk.

¹⁶Gora ar abenkam adjukaprĩn aben man ar abeno aban anhõdjãnhkôt abenmã mýjja ngã. Gora ar mã aman 'ãno dja. Gêdja gar ane nhym arým ar akam kĩnh. Kute amrêbê mete mry par ne kum õr nhym mekam kĩnh ja pyràk.

¹⁷Ar kute Metíndjwýnhkôt ar ajo ba djwýnhja gop ar kabênkôt amijo aba. Dja ar ar amã mýjja'õ jarê gar tu abên kêt ne akrãnmã kôt aba. Nãm ar prĩne Metíndjwýnh kabêno ar ajo djuw mex ne ar ajã ukanga kêtumrêx. Mýkam dja gar arkôt amijo aba? Bir, Metíndjwýnh kute ar kukjêr nhym ar kute kum amikôt amijarênhmã. Kam dja gar arkôt amijo aba nhym kam ar kĩnhkumrêx ne. Ar kĩnhkumrêx ne amikôt kum amijarê. Dja gar ã aro anhýr kêt nhym kam ar kum amijarênhkam kaprĩre ne. Gar gadjwý axwe amikam adjumar. Be, tãm ne ja.

¹⁸Gop ar Metĩndjwýnhmã ar ijarẽnh rã'ã. Ar ije amikam ijaxwe 'õ mar kêt ne ije kôt amijo iba prãmã, Jeju kute imã kukrãdjã jarẽnh kunĩkôt ije amijo iba prãm kam gêdja gar kum ar ijarẽnh 'ãno dja. ¹⁹Gora ar on kum ar ijo a'wý. Dja gar kum ar ijo a'wý bar amikrà kêt ne on arým wãm ar awýr bõx.

²⁰⁻²¹Gê Metĩndjwýnh ar amã mex jangiê ga kam ar apýnh mýjja mex djari kunĩo amiptãn ar o aba. Metĩndjwýnh kute memã umar mex jarẽnh djwýnh ta gêdja ar amã o ane. Gar kam kabẽnkôt akabẽn ne kôt ar amijo aba. Kute ar ajã amim karõkôt ar amijo aba. Metĩndjwýnh gêdja ar angrêk gar kôt amijo aba mextire. Nhym kam ar akam kĩnhkumrêx. Jeju Kritu ta gêdja ar ajo týt gar kôt amijo aba. Tãm ne kubê me bapumũnh djwýnhbê kumkati. Metĩndjwýnh ne me tyk kurũm akubyn Bẽnjadjwýr Jejuo tĩn ne o kato. Nhym kam kubê me bapumũnh djwýnhbê kumkatikam prĩne me bapumũnh 'ãno dja. Mrãmri ne kute mryki'ãtomti pumũnh djwýnh kute prĩne amim o djuw mexkôt kute omũnh ja pyrãk. Nãm ã me bajo mryki'ãtomtin prĩne me bajo djuw mexo ãmo ane. Mýjkôt ne kubê me bapumũnh djwýnhbê kumkati ne raxo kute me omũnh djwýnh kunĩ jakrenh? Bir, kute Metĩndjwýnhmã aminhõr nhym me kute bĩn nhym kamrõ bikapĩnkôt. Be, kamrõ bikapĩnkôt ne ajte me bamã kukrãdjã ny jarẽnh mãmdji ne o kato. Jeju nhõ kukrãdjã nyja dja rã'ã rã'ã rã'ã ne. Ê, gora gê me Kritumã kum kubê kumkatiti; umati, mexo tuknĩ jarẽnh rã'ã rã'ã rã'ã ne. Tãm ne ja.

²²Ê, akmere ar, àpnhĩre ar, gora ar pi'òk no'òkkam ikabẽn ja ma. Tu akrànãmã maro tẽn inomã amê. Ije pi'òk no'òko ar amã týt jangjẽnh kadjy ne ba ar amã pi'òk no'òk ne. Ije ar amã pi'òk no'òk krãnne.

²³Ê, ba ar amã arê gar ama. Nãm me gwaj bakamy Ximoxi mekbê ijê djārũm kaba nhym amrê tẽmmã. Gêdja on bõx jabej bar iro'ã wãm tẽn bõx ne ar apumũ.

²⁴Nã bãm ar akunĩo ama ne. Gora ar ar kute ar ajo ba djwýnhwãmã ar ijarê. Ne Metĩndjwýnh nhõ me mextire wãmãdjwý ar ijarê. Nhym pykabê Itarijkam me kute Jejukôt abeno kamyja ne me ar ajo ama:n ar amã amijarê.

²⁵Gê Metĩndjwýnh ukaprikkôt ar akunĩo djuw mex. Tãm ne ja.